


嘉靖龍溪縣志

地 310.87
275
部 = 3



龍溪志卷之八



人物

道學

宋王遇

遇字子合別號東湖年甫冠補太學生升上舍呂
東萊器之補以學職乾道壬辰廷試以上舍升甲
科調臨江教丁外憂服闕調處州教未幾丁內憂
再調蘄州教遇閑居不遠千餘里受業於晦庵南
軒東萊三先生之門考德問業以正學不明為已
憂及董教蘄陽講說語孟經史一以洙泗伊洛之
傳為正時相欲以掌故處遇且囑遇候遇曰朝廷
用人使之知又使之候是自取辱也亟趨部注懷

縣志卷之八

人物

安丞帥詹體仁鄭僑延致幕府丞相趙汝愚聞其
賢將擢用之而偽學之禍興矣循選調改京秩作
宰長樂時陳自強林未權勢熏灼遇不為屈繼倅
章貢韓侂胄聞其名屢欲邀之不可嘉定初丞相
錢守廟議以為大學博士未幾除諸王宮教授毗陵
東大飢有旨除常平使者時朝議欲變鹽法遇力
爭之以為今日之計竊買鹽乃他日計口責鹽之
原也議遂寢除大宗正遷右曹郎中嘉定辛未校
策殿廬畢事而卒遇居家吉凶喪祭一用古禮斥
去巫覡佛老之陋多所著書有兩漢博議行於世
勉齋黃幹與遇友善狀其行子仲訥以遺澤補官
任至羅

源令

陳淳

淳字安卿特科授安溪簿不之官居北溪學者以
北溪先生呼之淳為學不沽名徇俗雅好濂洛諸
書及朱文公所編近思錄論語孟子中庸大學等
傳欲羸粮往從朱文公授學未果紹興庚戌文公
出守臨漳淳袖所著自警詩以為贄文公恨見之
晚知其用工之久直以上達之理語之謂凡看道
理須各窮箇根原來處劇論詳剖且權然曰某到
此未曾將這般道理說與人今向公都說了問答
語詳見郡齋錄自是時造郡齋講論終日或至夜
分文公去漳屢語人以南來喜為吾道得一安卿
或士友疑問不合則獨稱安卿為善問後十年復
往見公病矣延及卧內扣其所得謂曰如今所學
已見本原所闕者下學之功耳居三閱月所聞皆
切要語而公逝矣每思師訓痛自裁抑日積月累
義理貫通洞見條緒嘗語學者曰道理初無玄妙
只在日用人事間但循序用功便自有見所謂下

縣志卷之八

人物

二

學上達者須下學工夫到乃可從事上達然不可
以此安於小成也夫盈天地間千條萬緒是
人事聖人大成之地千節萬目是
多少工夫惟當
開拓胸襟大作臺址須萬理明徹於胸中將此心
放在天地間一例看然後可以語孔孟之樂須明
三代法度通之當今而無不自然後為全儒而可
以語王佐事業須運用酬酢如探諸囊中而不匱
然後為資之深取之左右逢其原而真為已物矣
至於以天理人欲而驗賓主進退之幾如好好色
惡惡臭而為天理人欲強弱之證必使之於好好色
非非如辯黑白如遇鏌鋣不容有騎墻不決之疑
則雖艱難險阻之中無不從容自適夫然後為知
之至而行之盡若其論事多感慨激切深中時弊
嘗為人作奏劄言山東歸附有若可安之勢而實
非所以為安有若可緩之形而實非所以為緩不
可所以為之防其他為鄉里開陳利病如止橫飲

懲豪奸禁屠牛懲穿窬敢海寇及請改釐泮移貢院罷塔會禁淫戲禱山川社稷儀節皆歷歷可行試中都日歸遇嚴陵守鄭之愷延講郡庠僚屬之士來聽講者以數百計莆泉之士多游其門及卒學者痛慕或奔喪或就家為位而哭莆田陳宓大書其阡曰嗚呼有宋北溪陳先生之墓且誌而銘之淳故家貧蔬食弊衣畧無愠色奉親菽水盡懽父信淳屠淳喻以理因屏去母病革號泣于天求以身代弟妹未有室家者皆為婚嫁之葬宗族無歸者若干喪所著有性理字義三卷文集五十卷近時邑人林同吳玘相與梓行之其記文公語有郡齋語錄竹林精舍語錄門人記淳語有雲谷頰口所聞金山所聞初淳無專祀配享文公祠下國朝成化間兵部郎中林雍白有司建專祠弘治間戶部侍郎吳原疏乞有司致祭其祭文儀式皆內降云

國朝薦辟劉駟

駟字宗道一字良御後以宗道字行其先莆人也相傳系出宋尚書克莊祖陸一以行稱父諱寶字惟賢讀書好古志士也元末惟賢侍陸一翁游漳因家焉宗道少試吏于漳胡草澗宗華見其取予不苟異之勸修儒業宗道因棄吏業儒初與父自相師友已乃徧事漳之賢哲繼又往三山從趙彥進游彥進修程朱之學議論極為醇正宗道從之游不久而歸後彥進遺之書有相督過之意中間有所懲創開悟者疑亦多矣洪武十年以秀才應召時廷試八千人宗道對策第一上命學士詹徽密察諸人徽又以宗道居德行科上聞上賜宴內殿宗道與同時趙肅申甫皆以常布侍坐上拜宗道為都御史蓋慎選而大用之也時有狂人入座詔求直言宗道陳格君心澤民物二十事上嘉納焉

自是每侍食華蓋殿議大政有同列邵質者為人慘
刻行事多失大體衆莫敢言宗道上前數論之質
銜諸心思欲有所中傷乃謀其黨給事中董希賢
者以他事論宗道有詔徙南詔不久貫還所過郡
邑持之宗道因遜于播州以俟朝命之定上疑宗
道久不至遣朝使督其家與親鄰五六人者分索
于詔于蜀務得宗道乃止父寶行至蘭陵以憂病
卒其門人陳秘行至播州得宗道與俱歸告以父
故宗道遂披髮易服為奔喪禮至武昌哀不自制
赴水死時洪武二十一年也宗道之學少未定及
壯始定嘗自號悔非子蓋其少時之非也其學以
禮為宗凡修之身教之家以及於其鄉皆以禮鄉
人呼為愛禮先生其辭受取予一於道義與人論
得失物我兩盡教人為善必反覆開諭莫有所感
悟而後已最惡釋氏謂其絕滅倫理無復人道嘗
與莆人方師凱辨論釋氏直欲驅之使不得立於
縣志卷之八 人物 四

中國而後已其他辯正淫祀如道教所謂關元帥
者即關羽也宜血食於荆所謂張元帥者即張巡
也宜血食於睢陽皆非本州所宜祀所謂靈著王
乃唐開創此州陳元光也亦宜有司立廟官自為
祭民間不宜瀆祀有
文章十卷梓行於時

陳直胤

真晟字晦德改字剩夫屬籍時嘗以布衣詣闕上
書及歸欲以明初志乃以布衣自號學者往往稱
為布衣先生其先泉人國初苦倭寇乃設鎮海
衛以保漳之東土而籍莆人泉人來為戍守其父
安隸本衛後千戶所而生布衣布衣骨格高聳神
氣肅清望之非塵埃中人也年十七八即能自拔
於俗厭末作之蠹心而棄之惡異端之害道而拒
之專心致志以儒為業初時謂今世取士寔有專

業乃入長泰山中從唐泰治舉子業業成薦于有司至福州聞有司防察過嚴無待士禮乃辭歸自是不復以科舉為事務為聖賢踐履之學初讀中庸做存養省察工夫覺無統緒續讀大學始知為學次第乃以大學為據及讀大學或問見朱子傳採主敬諸說以補小學工夫始知敬者乃大學之基本也乃求其所以為敬見程子以主一釋敬以無適釋一始於敬字見得親切往往實下工夫推尋此心之動靜而務主於一靜而主於一則靜有所養而客念不復作矣動而主於一則動有所持而外誘不能奪矣常語人曰大學誠意章為鐵門關難過主一二字乃其玉鑰匙也蓋意有善惡若發於善而一以守之則所謂惡者退而聽命矣又嘗語人曰人於此學若真知之則行在其中矣蓋以知之真則處善安循理樂其行甚順然而氣稟有偏勝嗜欲有偏重二者用事甚順而易者反為

逆而難矣此聖門論學於博學審問慎思明辯之後又加以篤行也天順三年用伊川故事詣闕上程朱正學纂要其書首採程氏學制次採朱子論說補正工夫次作二圖一著聖人心與天同運次著學者心法天之運次乃言立明師補正學輔皇儲隆教本數事以終上文圖說之意書未上先上疏乞召見而陳其說不報及書上得旨看了來說時侍郎鄒榘掌部事漫不知其說云何其事竟寢繼而家居讀提學憲臣頒行勅諭教條有主敬窮理脩己治人崇正學迪正道敦尚孝悌忠信禮義廉耻等語喜曰此學校正教也然學校雖崇正教而科舉不定正考雖有正教不行也因採勅諭中要語參以程氏學制呂氏鄉約朱氏貢舉私議作正教正考會通定考德為六等考文為三等各有案例可據而行又纂長書告當道諸君子諸君子終不能推行其說其事亦寢布衣學有所得

者至是皆無所遇每四顧徬徨不能自釋聞臨川
吳聘君名欲往質之乃貨其家之直得五金携其
兄之子一人以行戒之曰我死即瘞於道題曰閩
南布衣陳某墓足矣行至江西張元禎大史止布
衣宿扣其學所得大加稱許曰禎敢僭謂斯道自
程朱以來惟先生得其真吳許二子亦未是
吳謂草廬許謂魯齋。如聘君者不可見亦不必
見也遂歸鎮海初創戎壘莆人雖多讀書家自布
衣為學而儒術始正自布衣與莆人李文舉諸前
輩講行文公家禮而風俗始正布衣有功於鎮海
多矣布衣生於鎮海遷于龍巖晚定居于龍溪之
玉州卒年五十有四其墓在江東之董坑其地施
氏所與也後十年提學周孟中祭以文郡守彭桓
立石官道傍以表之題曰大明 闕下兩上書請
補正學泉南布衣陳先生墓又三十年提學姚鎮
表章先哲郡守陳洪謨謂先生漳產也乃上其事
縣志卷之八 人物 六

名臣

宋黃彥臣

彥臣字叔紱英宗治平四年登進士第初調南寧
簿歷知長汀南安二縣轉泉廣二州倅遷莆汀劔
建四郡守累贈少師彥臣倅郡時有強盜守欲寘
之法彥臣疑其寃故緩之果獲真盜在汀日有犯
鹽禁百餘人以斤兩計當死彥臣私念立法雖嚴
行法不可不恕乃置鹽郡廷故不之問頃之鹽化
為鹵而斤隨減囚得不死建劔舊俗苦丁錢生子
不舉彥臣乃令保正月申官贍之後為定式彥臣
凡七子教之甚嚴長子頤為晉江尉嘗造一轎以
奉彥臣彥臣惡其侈焚之仍貽書責頤以故諸子

各加奮勵教歷中外俱有聲稱
臣有文集二十卷雜文數卷行世

黃預

預字幾先彥臣第三子徽宗大觀三年與兄碩同登進士第調汝州教授未上以薦除大學正時舍法盛行預篤意訓導特轉兩官出知桐廬縣有惠政入為監察御史以直言忤蔡京貶邠之宜祿尋起為廣東倉未行復貶宜祿卒漕使傅自得吊預與弟符寶其畧云才高毀至道直怨多擢使輶而中輟司信璽而見訶。守林元仲追述丁未登科題名記所謂察院符寶直道者此也預有書解行世於

黃頤

縣志卷之八 人物 七
頤字脩可彥臣長子也宣和中以父任補官有聲歷樞密院編脩大府司農少卿靖康初知楚州值京東震恐有劉士忠者肆為浮言頤便宜梟其首以安衆心既乃請罪于朝璽書嘉獎建炎元年徙知揚州安撫淮南東路朝論以頤熟於邦計將除戶部侍郎有阻之者乃加右文殿修撰二年春虜騎至城下時相黃潛善倉皇命頤赴京口因坐失守削秩上知之深未踰年盡復元官遂乞休致優游里開十有五年卒

黃杞

杞字景常殿撰頤之孫彥臣之曾孫也弱冠以世賞補登仕郎初任寧化尉以捕盜功改秩知浦城縣有清介聲再調溫之平陽有盜梟者自稱兩手俱折杞佯謂非其辜也聽以梟去其人乃以手舉

昂載于首以行遂坐罪通判太平州有圩田廣袤每歲修築民苦之祀召豪戶築與免差役民得無憂留守胡元質深器重之每有論薦必以祀為首除知肇慶府陞辭奏對稱旨上目送之丞相周必大參政留正屢薦于上將有內除祀力求便郡因除知潮州有惠政尋奉祀歸時朱文公守郡最為所重祀九月十九日生公贈以詩云須信九秋饒好景還遲十日作重陽。子煜知揭陽縣有能聲閩帥辛棄疾嘗薦之烜潯州推官炳煌俱以慶壽恩補官

顏師魯

師魯字幾聖高宗紹興十二年擢進士第初調番禺興化簿懷安丞改秩知寧德縣部使者鄭伯熊以治行薦于朝除糧料院質實時朝士不許待闕。改添差威武軍簽判屬丞相陳俊卿

縣志卷之八

人物

八

尤器重之召為官告院遷國子丞除江東提舉時天雨土日青無光滿朝諱言災異師魯陞辭極論之上曰卿所論極是改除浙西常平使歲課以寡聞上謂宰執曰書生能辦此且予職名候任滿召來尋除直秘閣淳熙七年召赴行在上疏論浙西園築之弊語及權倖除監察御史師魯奏乞增臺官以廣言路一日太府丞葛揆引對師魯謂朝廷雖乏人不應用揆輩臣雖不才羞與為伍能與揆外詞在言路三年每奏悉當上心上下曰卿可謂知無不言未幾請出外補諭曰臺中方且以為得人除太府少卿黃中丞洽舉師魯自代十年六月兼右司刑曹郎官適太學司成闕上諭宰執擇老成人僉以師魯對改除祭酒所取多名士上曰師魯到學未久規矩甚肅除權禮部侍郎兼兼吏部侍郎十三年冬學政修舉一如前日尋兼兼吏部侍郎十三年冬

金人遣使賀正旦差充接送伴使應所過州縣
供饋皆郤之十四年夏上䟽請外上曰侍從可
數卿未可言去太上皇帝升遐議者有獻廟號
稱祖之說公率禮官入奏三上議狀詞甚剴切
畧云仰惟大行太上皇帝宏濟多難紹開中興
功德兼隆上比太祖孝思罔極所以盡尊崇之
意稱祖立廟何所不可○其後朝號謚皆如所
請天下是之差充遺留禮信使以前知盱眙軍
高震副之陞辭奏云臣檢到北界虜人必令聽樂簪
遺留語錄竊見使副到北界虜人必令聽樂簪
花今國勢固非前日比虜必不敢強以非萬一
如此臣當守死以辭上側然至北界與虜辨難
者久之卒從其說使還復命奏事壽皇宣諭不
易不易久之復宣諭曰禮可謂盡矣左司鄭公
公顯賦詩有胡樂不聞忠士耳蠻花敢上直臣
頭之句除試尚書吏部侍郎師魯又在銓曹以

守法唯謹曩時部胥為姦士夫有請率無可否
故為出入辭以要之往往多淹滯之嘆師魯察
知其弊一裁以法國朝故事侍從滿歲為真師
魯自登從列逾二年未出疆前忽有諭師魯云
侍即在儀曹許時今欲為真如何師魯云除命
出朝廷某何敢預及使回猶以危言動上壽皇
素知師魯洞見忠誠奏事畢除命即下僅旬日
間兼吏部尚書師魯夙奏乞引年謝事壽皇優
獎之曰卿精力未衰未可言此降詔不允詔曰
朕惟王者諮謀猷於黃髮求典刑於老成故引
年告休雖曰常禮而大夫七十固不得謝者
卿純潔宿儒心克壯方置諸天宮之高選而
總常伯貳卿之務奉公守正何職不舉上章求
歸良所未諭即安厥位庸副眷期十二月除吏
部尚書十六年正月除兼侍讀上方倦勤將遜
于位遴選儒臣以遺嗣聖師魯感激知遇且謂

吾生平讀書今得預講席當不負所學光宗即位
師魯首陳正之說上嘉納之忽一日上疏乞歸田
里有三宜去之說上謂宰執曰師魯求去甚力可
優進職名與便郡除龍圖閣直學士知泉州廷紳
引孔戢尚書事抗疏乞留朝辭奏乞親賢積學以
崇聖德抑情制欲以愛清躬奏畢上宣諭曰銓曹
得卿朕甚惜卿之去翼日給事中胡晉臣內引上
曰顏師魯昨日已朝辭朕凡四次留之不住甚惜
其去卿等亦須到郊外餞之又曰同官之誼亦合
如此及餞行諸從官云今日之會蓋得旨餞送可
謂榮矣相與賦詩歎羨質實有同朝送行集○泉
南大藩船貨所通素號繁盛師魯下車行平易之
政以誠率下不為表暴或遇水旱齋精懇禱不三
日必應戢官吏之巡城搜稅者罷水春上供銀之
預借於民者閣安溪官田職田民田之逃亡者以
至嚴除行之禁令戒丁錢之措克彰彰善政殆不
一書經界行令脩其事宜師魯嘗紹興間舉行
是法條為二利三害上之遂止邦人德之市地於
闌闔中塑像立祠為佛老會以祝其壽家家繪像
事之惟恐其去二年冬有旨進煥章閣學士令再
任師魯雖浩然欲歸然感激恩命復眎事如始至
時留意學校葺洛陽橋丐閑之章累三四上上勉
從其請進寶文閣學士提舉隆興府玉隆萬壽宮
去郡之日邦人如失慈父母下至巖谷之民魚樵
之夫相與提携為花酒以獻既月邦人戀戀不已
作去思歌上聞之復差知泉州師魯累章避免未
奉俞旨而疾作矣享年七十有五官至太史大夫
爵漳浦郡侯食邑一千戶贈宣奉大夫謚定肅子
衡孫統俱以蔭補官

顏徹

徹字介叔一字子通師魯之子也少警敏莊重尚志節力學師魯奇之每奏疏必與之討論以茂才薦授南外睦宗院以便侍養未幾丁定甫公憂服闋除授西外睦宗院宰永福徹多歷外任有政聲丞相葛公邲樞使王公閻首薦之又為樞帥鄭公僑知宗趙公伯過所薦嘉泰間丞相謝公深甫參政何公澹薦三十五人徹預焉有旨堂審而徹疾終矣官至奉議郎諸子皆歷通顯累贈光祿大夫

顏耆仲

耆仲字景英師魯之孫徹之次子也弱冠以祖澤補承務郎調福州海口鎮鎮有書院闕廩耆仲始置莊田製祭服鎮人生祠之知鄞縣回祿有警幾及府治耆仲以厚賞募救之火尋滅乃給以私帑

縣志卷之八

人物

十一

八

除監六部門宰宗升遐差通判紹興府屬以因山之俊峻特差通判臨安府耆仲初薦于漕待省至是擢進士第俄遷進奏院出守江陰脩泮宮豐稟給士論翁歸會歲飢力請于朝得米三千石全活者衆召除太府寺簿遷屯田員外郎歷吏部郎中壬辰策士克編排官除右司郎中直秘閣出為淮東提舉兼提刑陞辭論君子小人上曰方今孰為君子孰為小人耆仲對曰公論所予者君子也所不予者小人也上嘉納之曰卿知守家法不事詭隨所居扁知守堂取聖語也除直寶謨閣樞密院副都承旨未幾又除司農少卿兼中書門下省檢正諸房公事上眷方隆耆仲浩然有歸志遂除知池州改江西運判兼權隆興府召除太府少卿力丐祠提舉建寧府武夷山冲佑觀耆仲雅愛士類所至以崇學校獎風誼為先於鄉曲尤加意買田為桂莊歲入錢四十五萬餘及田未墾者種可百

斛積三歲入以贖計借之士詔歲試士于平湖書院旌賞有差士譽歸之官至中奉大夫爵龍溪縣開國男端平間朝廷登用正人與弟頤仲齊名俱蒙顯擢更迭中外天下稱儒學政事者必曰二顏

昆仲為稱首云

顏頤仲

頤仲字景正師魯之孫者仲之弟也未出幼穎悟師魯愛之理宗朝以祖遺澤補官歷寧化尉轉西安丞除知西安縣皆有美政民德之丁內艱服闋調衡山未上委轉運司幹辦公事遷通判臨安府端平元年除將作監主簿出知嚴州時錢楮中平之令初行吏民震恐頤仲爭曰忤旨獲矣罪止一身便文自營害延千里朝廷不能奪令用全楮解發明年乙未入為司農丞攝

縣志卷之八

人物

十一

金部郎官除直秘閣兩浙轉運判官時禁旅飢出許語聞于輦轂之下眾遂涵涵頤仲詣諸營用言撫定之除戶部郎知臨安府浙西安撫卒循許語頤仲曰昨者撫諭從權弭變耳今事定宜討有罪以尊國體進將作監仍兼府事輪對言今日兵驕楮賤皆由寬而不嚴致玩之漸散而不歛積輕之源上曰軍民有爭當分曲直不可姑息也頤仲奏曰敢不仰遵聖訓上又曰楮尚折閱頤仲奏物少則貴多則賤通者楮幣印造數多知散而不知歛臣謂約浮就實全在節用又曰中外弊事甚悉每奏上輒稱善明年丙申進太府少卿京尹如故嘉熙改元以直秘閣奉武夷祠除廣西轉運判官首奏乞罷海外瑣崖僭萬四州盜本錢并蠲免二事皆報可三年令赴行在奏事言今日旱被數路潮意凶年倡義試為桂莊以助計借者里中地橋壞道皆募

衆繕葺耆儒勝士率子弟北而馬屬疾初無甚
苦授遺表時方晴霽忽雷起西北而頤仲逝矣
上聞贈四官依條與致仕遺表恩贈銀絹如格
時景定三年也壽七十五與定肅公同鄉人異
之子興祖主管西外睦宗院孫一龍承務郎弟
圭仲興寧令姪輝祖監涵頭倉象祖戶曹榮祖
廣州益倉皆以
頤仲澤補官

孫昭先

昭先字延父家世業儒父昌清修博學以望為鄉
校領袖安貧守道澹如也以昭先貴贈中奉大夫
昭先兒時穎悟中奉每附其背曰此他日能大吾
門者登淳熙進士第詞興化簿迎侍之官中奉公
書忠孝勤儉四字于屏示之以居官行己之大槩
昭先佩服惟謹民有冤枉率請郡自列願於昭先

縣志卷之八

人物

十三

年四

求直焉郡守器之再調丁外艱服除坑冶司辟以
檢踏官昭先究心銅課杜倖門室蠹穴興利革弊
鍾官賴焉改秩知安溪縣為政簡易催科有程其
於差役必親按戶籍第其先後文多端以寬恤之
民至有先期願克者又脩學舍躬課程廢剝之田
以贍教養邑人德之尋通判婺州代還時宰執欲處
以班行昭先徑受分司糧料院而去俄易昇廣郡復
辭不就嘉泰初有旨令宰執薦士丞相謝深甫知院
何澹以昭先應詔差幹辦行在諸司審計司班當輪
對論謹名器嚴法度等事昭先敷奏詳敏上嘉納之
除司農寺簿時大農告匱朝旨委都司戶部同寺官
究積弊之原昭先偕同列條具甚悉如催督綱運拘
權糶本理豁借支剋除耗折等事一一見之施行未
幾遷丞出知衢州陛辭奏云今日士大夫之為郡
者大率以財賦為急務或振括苛細以銜已能或
規求登羨以希窳課民力已困而聚斂不休衆怨

方興而迫促愈甚曾不思財者民之膏血民者國之基本膏血既竭如基本何又奏行在百司諸軍歲費糧粟一百七十萬石而牧馬等料亦不下六十萬石今椿積之米雖及三百五十餘萬然浙西上供錢支收於災傷蠲免歲率以數十萬補之若飢饉荐臻何以爲備○昭先至郡庭見士民輒訪利害不旋踵即行之兩造在庭必詰問所欲言親爲剖決且繕學舍葺城壁下至津梁驛舍靡廢不舉適歲旱絕葷減膳精意以禱甘雨隨注郡人鼓舞或爭有輿以行小歉則檢放秋苗至萬餘斛復爲民代輸折帛二稅爲錢二萬餘緡發稟勸公隨地賑糶全活不可勝計臺閩合舉治行尤異爲一道之冠召對論內治外治等事畧云所在州縣土兵弓手所以衛鄉井捕寇盜也近者諸郡禁軍朝廷起發僅留其半雖繼行招募而名額未足閱習未周所恃以巡防阡陌者惟土兵弓

手是賴今欲做廂禁軍之法將其中不勝任者許以其家強壯子弟親戚填代名役仍令巡尉皆以鞍馬從事不得占破名役○上善其言首肯者數四即日除吏部郎分別流品提防吏姦銓綜惟允轉對復奏言時方多事公邊官吏赴上並不以時欲將極邊次邊賞格特與優異候事定日仍舊有旨從之除浙東提刑昭先念人命所繫案牘至前必端坐披閱反覆推究或有疑獄即延幕屬上下其議不專以臆說爲斷邑有誣平民爲盜以希賞者昭先閱實縱釋十數人皆感泣而去屬吏有貪殘昏謬者踰年奏劾幾二十餘每行部必戒官吏毋得供餉騎從減省資糧靡履悉自齎辦安邊所藉鑑湖之田募民請買昭先因條具利害畧云乞委自安邊所以募民請買之後差官至瀕湖去處立石以定界至仍將湖之見存頃畝載之版籍嚴示賞罰使有田之家不得侵占朝旨下提刑司行

之。嘉定二年召赴行在再除吏部郎入對因論
朝綱未清邦用未節士氣未振民病未蘇四事又
論監司守臣到任半年各條目民間利病以聞近
歲稽緩或苟且以應令甚非立法愛民之本意六
月除樞密院檢詳諸房文字歲旱詔百僚上封事
昭先條陳四病甚悉畏云沿邊流移病於無以自
瞻內地猪券病於不能通行諸道刑獄病於奏報
之稽遲改送之紛擾州縣稅賦病於催科之峻急
征推之煩密。七月兼右司九月除右司郎中三
年正月輪對論保伍之法令州縣務在便民不為
煩擾又論都司近日詞狀滋多宰執大臣重勤省
闕非所以清中書之務除大府少卿抗辭弗獲遂
丐外除直寶謨閣提點江東刑獄還家需次與親
朋道舊為樂戍期且至即上章告老改主管成都
府玉局觀既滿申引羊之請祠祿仍舊以明堂恩
賜三品服昭先至是累疏乞謝事特轉朝議大夫
孫叔謹

孫叔謹

叔謹字信之昭先長子也幼穎悟既長毅然立志
問學以遠大自期初以郊恩補官調揭陽尉未上
薦于漕闈又試中大法既上恪恭乃職訓閱士卒
莫不精練嘗聶邑事邑有稅務距州務七十里而
近民重困於征權叔謹力言於郡弛禁以便民會
守黃自求至即奏罷之踰年除大理評事叔謹持

守正無所回撓廷中稱平輪對指陳時事莫不切

當奏云旱蝗為害所在荒歉民生艱阨正力行好

事之時胡運衰微群盜侵擾邊境搶攘實謹固封

守之日乞責州縣長吏以賑卹之實政課沿邊帥

守以備禦之實功又奏廣郡亩米於省限未滿

之前及不繁竒零之數高價折納以困產戶而又

况有收糴以擾販夫乞行禁止嘉定九年再薦

于漕次年登進士丙科堂除知莆田縣迎侍親闈

官事悉以諮曰所決民訟必酌人情合法意僧寺

歲租立約以第其數郡守太博吳炎秘監葉禾皆

為刮目憲使應祖巡歷至邑民絕一詞大加歎異

露章刻薦有治績彰灼為諸邑冠之語秩滿授泉

州通判丁艱及服除歸班遷大理丞上初即位叔

謹面對剴切畧云天下大器得之為難守之尤難

經營締創非備嘗艱難無以開天下之治纂承似

續非克念艱難無以保天下之治又指陳今日炎

變乞修明君德振舉治綱謹好惡於出令之時審

輕重於用權之日開衆正而杜群枉旌宏直而黜

佞諛選將練兵以求固圉之道折衝禦侮以強制

勝之威。上嘉納之會卿少虛位叔謹專寺事獄

縣志卷之八

人物

十七

八

弱教閱具文公申嚴日教親課其藝常俸之外所
當得者悉捐為修學費更創四齋增置學田新思
韓堂訪求昌黎手澤刊諸壁簽樞陳貴誼為之記
至謂安知後之人不以侯之思韓公者而思侯乎
嘗以羨錢二萬餘緡為三邑代輸下戶益役潮人
感其恩而尸祝之於韓山昌黎廟去之日黎庶擁
餞於郊至追數舍不止云初少卿遺澤叔謹子
該補乃遂於其姪士大夫義之子敏學迪功郎

國朝王昇

昇字日初號魯庵永樂甲申登進士第初為江西
安福令有惠政陞大理評事進左寺正獄事多有
所平反時錦衣衛有張千戶者繫獄款上當死昇
察其冤特平反之後昇過建溪舟觸湍石覆忽有
舟倉皇來救及見即前千戶也蓋千戶偶有事於
閩而適遇之云昇由左寺正以楊文貞公士奇薦
縣志卷之八 人物 十八

擢撫州守上降勅賜宴命乘傳以往昇作郡以
惠利為本尤重學校惇禮俗民愛之滿九載撫民
列疏借留進二品階復任二年以疾辭歸昇天性
孝友慈惠尤謹厚有古風初在郡庠教授陳思賢
被逮赴京質實事見本傳。密以白金若干兩寄
昇教授死昇為位以哭仍遣人賁金入廣以歸其
家云昇子彞漳佳士林
祺著一行傳稱彞孝云

周宣

宣字政舉正統乙丑禮部會試第三人致試賜第
二甲進士出身初授戶部湖廣司主事未幾車駕
北征糧草浩繁欽限急部議放支官衆莫敢行宣
獨領命曰此易辦耳宣至草場令鑿數門同時放
支不日事完方復命而父訃音至衆保留宣宣不
可乃奔父喪服除改任本部浙江司主事滿考以

宸聞陞潮州知府宣下車之初修文廟葺韓江橋築海堤有土豪盧姓者暴橫鄉里宣擒獲不即加刑諭以道義而遣之豪叩首謝罪遂變為良民諸邑聞之皆傾化如風偃草潮環海為區海寇黃于一等作亂燒劫揭陽縣治而下夏嶺等二十四村皆被脅從宣親督兵擒殺黃于一等餘賊不敢出宣謂盜魁既得餘可撫而下也乃出榜令鄉儒陳驥等入賊中張掛而自詣賊營撫諭各賊皆釋甲羅拜乞降宣因遍歷各村放回被擄男婦撫過從良民繼而山賊羅列寧等復集眾為亂燒劫惠州府宣潛起從良人黃伯良等出賊不意搗其巢穴擒斬之察脅從良民如初時湯田黃寨等處皆從賊省臣欲乘勝盡滅之宣謂脅從罔治乞貫免共得復業戶七千全活命數萬賊平當道以宣漳人漳潮相密適難以行事奏改調宣宣即日引道民遮留不得相與涕泣乃集二百餘人赴闕上疏

縣志卷之八

人物

十九

乞還宣疏未上而新注太守出京矣頃而海寇復大亂攻圍縣治劫掠居民官吏束手無策鄉儒陳驥等白當道曰事亟矣必周守復來其事乃定固令具書請宣宣慨然為來入境軍民胥慶宣白當道開城門納逃難諸良民時府學號舍寺觀及宮廊曠閑處所皆聽搜宿病者給醫藥死者給棺槨貧乏不能自存者皆設法賑濟之潮人大悅當道欲遽發兵宣曰彼雖為賊良心猶存况未窺其虛實萬一損吾威重則事去矣不如先招之招之不數百斡來皆彼堅執銳魁渠服色僭擬侯王宣謂曰若等既欲從良何為乃爾於是皆投戈釋甲夫僭服相與羅拜宣為勸哭眾亦哭聲振海嶽當日單騎親詣賊巢因而徧歷二十四村且慰且諭海濱有淫祠賊卜神以為從違既約日入降而復猶豫宣問之曰卜神不吉宣夜抵神祠告曰民欲從

良神何以告不吉再告不吉是神不知有順逆得
當別作處分矣次日賊復往卜報曰吉然賊雖得
吉卜而終猶豫日使人覘之團營結寨如故宣告
當道曰賊可滅矣欲降而猶豫衆不為用矣遂出
兵一鼓而滅之潮地悉平事聞朝廷遣官賫表裏
賞勞廝役以下并及焉陞山西行太僕寺少卿尋
陞太僕寺卿賜食正三品俸仍掌寺事繼而丁母
憂卒于家宣少有文名銳志為學每行路往往潛
思目不他顧遇得意處則笑不止人以為書蘊其
為詩文多出新意自成一家或與古傳註錯有易
齋稿若干
卷藏于家

潘榮

榮字尊用別號疎庵其為人長身玉立器宇不凡
登正統進士第景泰元年拜吏科給事中凡參駁

彈劾務存大體時朝廷以言事者多觸忌諱詔禮
部者詳查有礙治以罪榮上疏曰陛下初即位務
聞言路今此令下天下將謂朝廷以言為諱上是
之學士倪謙以經筵官丁憂乃賡緣謀起復榮上
疏指斥之聞者稱快天順六年以吏科右給事中
受一品服充琉球國冊封使榮往行冊封禮因宣
布朝廷德威祠王以下皆拜手稽首稱頌天子恩
德及歸颶風大作幾覆舟榮倉皇拜禱忽有二火
星集捲端而風旋止既復命擢本科都給事中成
化六年擢南京太常少卿十二年遷南京戶部右
侍郎奉勅總督糧儲尋以十三道推舉南京都察
院右副都御史仍奉勅總督糧儲兼理屯田事因
而制伏奸冗削剔宿弊省落漕運諸般剝費共得
羨餘米數萬斛以備賑濟十七年以推舉入為戶
部侍郎特旨掌部事時兩浙責償監課急人以為
病特奏免之十八年漕運蹇澁命往視漕不踰月

糧運畢通賜宴慰勞二十年陞南京戶部尚書二
十三年考滿詣闕乞骸骨蓋公乞閒疏至是三上
矣優詔許之命給驛還家家居十載卒壽七十有
八訃聞贈太子少保遣官塋葬賜祭塋地在城
南五里許故名尚書嶺榮為人寬弘平易與人交
洞見底裏不言人過凡服御鳥獸花木珍玩諸類
皆澹然無所好晚年居閒每家廟朔望及時祭必
躬行禮子弟以高年謝止之公泫然曰我居官四
十載事先之禮多闕今敢
自逸耶鄉人視為楷範云

林同

同初名大同從里辟省作同字進鄉號訥齋家世
相承以儒為業祖恕堂教授鄉里同登天順進士
第授工部主事戶部主事歷員外郎即中戶部總
芻粟紛不可理同撮樞要作指南錄嗣政者皆以

縣志卷之八

人物

廿

八

為便成化庚子郊甸保定饑奉

勅賑濟同

到保定勞徠旬宣既推行詔書條件復奏行利
害所宜施罷者共賑濟軍民二十五萬三千口明
羊擢江西左叅議權貴請託皆格不行患民不時
莖出令勤民莖其無主可責莖者官為買地叢莖
之丁未以失意於權貴調廣西弘治庚戌未福賊
出掠太府檄同偕總兵官馬俊禦賊馬性躁同佐
以計中賊忌諱賊不敢出後馬不用公計卒及於
甌其年擢浙江右叅政授璽書督理糧儲浙江財
賦大往往為姦人所欺隱乃按籍考賦民無容姦
歲起運糧舊例聽軍與民允軍倍責耗民不堪同
引援證據言之都御史以遏其弊民始紓甲寅
寅陞廣東右布政使轉左布政使嘗條陳利病二
十餘事督郡縣行之又勸民行呂氏鄉約及文公
家禮謂聖賢言近而效遠不我誣也巡按御史王
哲奏廉能吏十許人乞旌擢同居首藩憲大僚見

巡撫都御史皆無跪禮自韓雍來始跪及唐珣繼
來衆跪同獨行不跪禮同見唐以事臨之同不為
動不父珣沒其子過廣同待以禮戊午入覲過漳
漳故土也時大旱同為鄉人步禱得足疾遂上疏
乞骸骨詔許之甲子考終正寢壽七十一同為人
柔外而剛中喜為義其居家鄉也少與叔父敦學
後卒于京即為治喪護歸葬于其父松軒墓左墓
如松軒制時祭以松軒配及自出貲建大宗祠堂
以合族人及告郡縣與群有力者移建觀瀾書院
於文山之麓塑大子及四配像仍置祭田祭器以
修祀事若其貞白之操則得之天性少讀書湖州
時同舍生夫金同得之亟以歸其人及官戶部舊
識人以曹至餽茶及啓茶有金鍾二同驚遽曰足
何不諒我耶亟追其人還之居官四十年祿入
得隨散卒之日
家無餘貲云

縣志卷之八

人物

世一八

陳宏

宏字丕道登天順甲申進士第拜監察御史處兩
浙鹽課及按淮陽諸郡俱有聲成化初彗掃台逼
斗詔求直言御史林誠與宏等交言商輅當康定
朝不能保護諸位今不宜復當國願罷輅以謝
天譴不備也未幾遷湖廣按察司僉事沅江有豪
民暴橫鄉里莫敢誰何每與人爭貲產輒聚衆數
百持刃鼓譟而往良善承風而靡宏持界之法常
德武陵與岳州石門二邑爭田累歲不決民逃田
荒賦無所出宏挾二郡至爭所旁詢衆論斷以一
言而兩爭俱息賦役以均民復業如初荆州賊首
封敬中據洞庭之險擁衆千餘操舟標掠人被其
害府衛率易捕之反為所敗事聞以殺賊事委宏
宏以計捕獲敬中并餘黨以功陞副使不幸丁母
爰歸卒于家年方五十一宏長於政事而加以直

氣惜乎未究厥施孫
遷今為監察御史

魏富

富字仲禮別號希軒登成化丙戌進士第選授廣
東道監察御史辛卯天下諸司入覲盜且偵伺
為姦利富以次當往巡察戒行先裁其同事官校
不入約束者盜聞之惶駭去癸巳巡按廣東廣
遠去京師下吏多不法林蠻洞蜒時為厲富至
下令曰蠻蜒固民也民而為盜牧民者之驅之耳
庶得不法吏若干人置于理蠻蜒皆復隸編戶中
乙未遷浙江按察司僉事癸卯進副使凡在浙十
又三年浙群惡少多相聚販私醴因為標掠富捕
而繩之縣健令有為豪橫所誣者久逮繫同列莫
敢直富直而釋之弟有訴兄官居匿親喪者兄亦
持左驗弗能辯富以浙人兄弟各立主密致之兄

縣志卷之八

人物

廿三

之主乃新立者兄遂伏辜嗣是人相戒勿欺浙東
西無遺姦焉蕭山諸暨有石塘岸白塔湖口水啞
善崩富募人伐鉅石為防各數十里許又疏為斗
門以走潦水嘉湖寧台荐飢富親往發粟賑之遠
不能致粟者與其直所存活六萬餘人仍積粟萬
斛為後備浙東西無遺便焉弘治改元進江西按
察使江西吉安故諱于訟富始建議增置推官一
員專理之僚佐巡歷歸常問曰去吏之墨者幾何
直民之冤者幾何一時僚佐皆以風力自見無脂
膏充位者壬子進都察院右僉都御史整飭薊門
等處邊備兼巡撫順天等府燕薊畿內地中貴人
多操利匿亡將領守臣怙侈者亦倚以為援富部
分將領授以成筭曰弛而構者刑茲無貸其守臣
則常戒之曰固而畿本惟爾能弗能則予有秩罰
一時將領守臣皆用命貴人亦無有相盞者會
疾作乞歸詔有司時其痊可起用御史朱文按

閩奉前 詔奏起用遂改南京大理寺左少卿尋
進本寺卿在職明慎庶獄多所平反每文武臣集
議大事富於群衆中時出論斷隱然繫留都重輕
者垂十年正德改元進刑部右侍郎是年年已七
十矣銜命就道隨乞休疏凡三上 上監其誠悃
令給驛歸歸之明年逆奄擅政縉紳間往往得奇
禍識者又謂富之知幾也富在仕途四十餘年隨
事盡職未嘗立異取譽而所至輒以譽終痛父母
不逮養為孺慕者終其身不易先塋所在皆脩以
田廬以延孝思宗姻中有長未婚嫁或貧不舉火
父弗能塋者悉為之所自奉則疏衣糲
飯泊如也人以為有晏仲之遺風焉

顧斌

斌漳州衛指揮僉事正統十四年鄧茂七作亂漳
寇乘之作雲車以臨城斌時海上備倭領將士入

縣志卷之八

人物

廿

盡散家財召募敢死士出與賊戰并用長斧砍其
車城內外大喊賊奔潰溺死者甚衆賊再來斌與
捕盜周世綱合再破賊一境賴以保全
有古武臣風事聞陞福建都指揮僉事

儒林

宋

辯字崇仲登徽宗大觀三年進士第調古田尉獲
強盜三十餘人為戒賍得免死或告以賍減不應
賞格辯曰利囚命以取官非吾志也遂調南康丞
遷福清丞有誣告平民事妖術者辯為申雪保全
數百家知南恩州道遇蒞藜賊曰聞公德政願乞
更生辯招來之郡無城郭民苦於海寇為之築城
植刺竹寇不敢犯舊未建學雖有長才秀民一切
編土丁身役辯為學舍市田置書聚生徒以教養

之免秀民土丁之役政成乞祠里居凡二十六年
未嘗以私事撓公家時詔郡國採訪致仕官精力
未衰者以名聞守林孝澤欲舉為首辭力辭不就
戶曹陳嶠作詩美之詩云一寸功名心已灰翩然
解組賦歸來中興天子登耆舊二十餘年挽不回
○記問該博開門授業執經問難者號曰蕭夫子
卒年八十九子毓
日益皆以恩補官

黃頴

穎字秀實少師彥臣第五子年二十四以上舍免
省赴廷試時彗星見穎指陳時政觸忌諱抑殿
兩科調秀州崇德簿後歷樞密院編修官兼符寶
郎俄遷中書舍人方拜命有忌其材者出為提點
江州太平觀為人溫恭廉介尤工書隸有周禮解
義春秋左氏事類行世子澤將仕郎孫樛五試禮
部

黃樵仲

樵仲道夫號敬齋察院預之孫少師彥臣之曾
孫也童時舉動如老成人年十四有五有聲學校淳
熙五年與弟杰同登進士第初調未福尉再調汀
州錄參俱有善蹟俸外添支一無所受自書于屏
云俸薄儉亦足官卑清自尊謝事歸每旦率子弟
衣冠見家廟退則默坐或至終日飲食衣服不求
鮮美居喪二年無笑容鄉里有非為
者惟恐樵仲知之也鄧司諫守漳關郡學行鄉飲
皆委樵仲主之朱文公守漳禮請入學詩云器資
渾厚操履端方杜門讀書不交權利鄉間有識莫
不推高若以禮請屈居教導必能使諸生觀感而
化有所興起○及講小學書文公每稱善卒之日

神采自若文公遣倅翁德廣經紀後事又欲為之改正行實不果有禮記解小學口義行世

李則

則字康成以學究紹興十二年特奏名少孤力學初試太學不偶浩然東歸教授生徒至百餘人如揚汝南李恂輩皆以師禮事之累薦鄉書多占前列自號益壯翁初授桂嶺簿攝富川令調泉州德化令皆有政聲則之學兼得於蘇程二家其教人大抵以仁義為宗故人稱之曰鄉先生云

楊汝南

汝南字彥侯有俊譽擢紹興十五年進士第初守李彌遜奇其才勉試詞學將行顏師魯送之以詩向來手筆驚燕許從此科名冠鄭陶汝南既進卷中書有司以其文崛奇不署以第調贛州教授再

縣志卷之八

人物

十六

調廣州教授撫詩中庸春秋要旨著經說三十篇以授學者乃表進于朝祭酒楊椿覽之曰真今之師範也薦知古田縣以教化為先務修學舍置學田日謁學考德勵業務臻成效用是古田學者入試南宮與對大廷多居首選縣有安福橋汝南造之君子謂其得為政之體惜其官止于古田其施未究也汝南有志學古者初筮以廉平公動為四字符而佩服行之故隨所至而皆有聲嘗與高東溪相交善間嘗扁其所居堂曰不欺又自號快然居士蓋人惟不欺則仰不愧不作心自快然此其學為有本也其文章亦稱重于時鄉居講學戶外之履常滿傳侍郎顏尚書皆游其門門人立審象哀次其文成集留丞相正為之序云

黃樵

樵字寔夫少穎異樵仲之弟御史預之孫也淳熙間為太學生無試不魁該升上舍忽內艱訃至即奔喪服闋中舍選入對大庭獻十論升進士丙科朝士皆求識面調南劍教官日以龜山了翁之學勉諸生嘗考校南宮知舉木尚書謂人曰經義非黃架閣不可時三魁皆樵所取樵家居及在太學受業常數百人凡課程經其刪改者用之皆為首選武學諭萬夢實至塑像于家朝夕瞻拜焉有詩解行世今詩經大全多採之

蘇竦

竦字廷儀青焦人性嗜學登慶元五年進士初調肇慶府推幕有廉介聲政務之暇集先儒詩易二禮傳折衷以已見履行純篤士流師慕之門弟登科居多焦溪儒風之盛自竦始子溥曾孫文燦皆

縣志卷之八
人物
二十七
士第

黃學阜

學阜字習之父珙紹熙中以禮記兩薦于鄉學阜其長子也傳通經史尤長於詩書春秋慶元間預鄉薦入試南宮策問三舍法弊學阜謂愚獨愛伊川請改試為課及制尊賢堂待賓齋有司大書曰此必偽學之流黜之嘉定十六年始登第任番禺簿趙帥師楷每事必咨之尤為丞相崔時料院虞衡所器重再轉為鄱陽丞待制李性傳延入郡齋校勘朱文公續語錄因薦之調泉州察推需次于家郡守方來屈居學職哀論孟義數章辨折界限以訓諸生比至泉以廉稱年七十丐歸手不釋卷所著有評古一策補註東坡詩一部

唐咨

唐咨字堯卿 與貢士州學正石洪慶子餘
林易簡一之施允壽伯和皆以旦評推重朱文公
守郡延之于學為諸生楷式載之公牒各有品題
志行久益可觀施允壽石洪慶皆以耆
艾之年進學不倦強毅方正衆所嚴憚

陳思謙

思謙字退之 學問該博教授後學嘗魁鄉
薦著春秋三傳會同及列國類編朱文公喜之以
語其門人李唐咨以女妻之

林大年

大年字壽卿 初試太學以詩賦中亞魁月
書屢占前列累分數幾及格輒止拂袖歸養兩經
恩免不願受請于郡乞就鄉舉人或難之郡守以
辭遠就近特聽其便年八十二以書義再預鄉書
謝啓有云減伏生之八歲加太公之二年後不赴
南宮郡延為州學正年九十餘耳目聰明行不以
杖暇日與生徒討論未見之
書終老于湖山年九十六

元黃元淵

元淵字君翊 其先南靖人也入元徙居郡
城西始為龍溪人父進字文卿龍溪縣學教諭弟
誠祖字君復同受學家庭與時賢林廣發周佑為
友誠祖為建安書院山長元淵一試科目不售遂
為隱計自號北野至正中用憲臣楊不華薦署漳
州路學錄秩滿陞泉州路儒學正以卒宋紹熙間

朱文公守漳愛臨漳臺高爽謂宜作書室未果後
守危祺乃成公志作龍江書院以聚學徒嗣守方
來乃於書院左方作祠以祀公入元以來鞠為丘
莽其地為浮屠氏所據矣時元淵為龍溪縣學錄
奮曰文公書家傳人誦幾徧天下而遺跡在吾邦
者可使熄滅無聞乎乃謀諸郡博士馮灝翁龍溪
教諭郭元發使言之郡自頭出私錢別買城東北
隅重建之監郡納兒苦伯以下大加獎與泰定四
年初作大成殿祀先聖先賢次作祠堂祀文公以
黃勉齋陳北溪配別作講堂齋舍以處師弟子天
曆四年告厥成功郡守貳率諸生行釋奠禮明年
廉訪僉事東平馬益行部見而善之移書郡守俾
請方伯連帥上之朝廷以龍江書院舊額列為學
官焉初元淵與莆田陳旅為友旅受知虞學士伯
生乃為其書請伯生作龍江書院記謂書
院成而元淵家以貧蓋忘家以為之也

林廣發

廣發字明卿文山人為人力學有大志嘗謂陳安
卿號北溪高彥先號東溪蔡汝作號南溪因自號
曰三溪蓋欲兼三公之所學而有之也廣發幼慧
九歲通經諸長老問其要義隨問隨答十二三
中師不能教而推讓之自是通貫六籍融會百氏
善古文工唐詩郡學三聘為諸生師至正七年長
子弼領鄉薦入試禮部廣發與俱行都水少監楊
有慶使江南回時同宿驛邸與語達旦楊謂人曰
此公經濟才也至京師名大振館閣諸老皆定交
焉後以部使者薦授泉州安溪學職邑僚師事之
會寇作奉府檄招降以勞版授其縣主簿仍謀軍
府事每俘至委訊輒曰此平民也府帥問何以辯
曰獲於巢穴者為賊捕於井里者為民此俘皆自
井里得之何謂賊自是俘至多免死福建分省請

置汀漳屯田萬戶府中書奏以廣發為其府經歷
分省屢有差遣廣發不得理府中事兵民懷之請
諸分省曰願還此官以活我邊人不幸
在府未久而卒其所設施者蓋未究云

國朝鄭深道

深道字文玄翠林人父可敬薦行國初以明經
薦典教清流深道洪武丁卯領鄉薦明年會試不
第被旨視兩浙鹽運使司獄深道庶得數人非其
罪出之比還其人各懷白金尾舟後以謝深道却
之既復命授程鄉縣學教諭連丁內外憂改海豐
又改嘉興秩滿遷寧波府學教授嘗應聘典順天
湖廣江西廣東文衡號稱明有司求樂末陞司經
局校書時仁廟在邸屢承論問及即位召見
賜膳侍宴褒勅之詞有學問老成操履清慎等語
陞梁府紀善正言讜論匡濟弘多年七十求致
事王寵眷方隆重違其情許之乃徜徉雲水間
飄然自適嘗建平林夫子廟塑先聖及四配像又
增塑文公像復作書院於廟左扁曰觀瀾歲延師
以教鄉之子弟鎮海衛禮請公領教事衛人士始
知向方年八十二卒子嘉宣德四年
以禮經魁應天鄉試歷趙府長史

胡春同

春同字宜年永樂改元以易領鄉薦授金華府義
烏縣學教諭義烏久乏科第教官多落職春同督
課諸生勤甚後三年大比一榜得四人焉自是科
第不乏秩滿陞柳州府儒學教授丁內艱起復仍
除重慶府教授春同偶道病稽遠程限責除漢陽
司稅改蘇州稅鄉人王昇為撫州守乃論薦于朝
得改秩教授吉安府吉安故文物淵藪握教符者
坐受成績春同至為教法如義烏時有僉事王某

者揚言于衆曰教授如春同真可為五忠一節
鄉邦師表嘗典山東文衡號得人不幸卒于官
春同居官清慎卒之日無以為殮士類嗟惜父
宗華以明經應薦為漳州府學訓導兄宜衡以
賢良薦授中書舍人與修太宗仁宗二帝
實錄陞左評事胡氏父子兄弟俱以文鳴有三
胡文集梓行于時

陳晔

晔字子海 為人豪邁不羈博學強記善屬
文年十六領永樂甲午鄉薦三試禮部皆不偶卒
授建昌府儒學訓導遷南京國子學正出為常州
府儒學教授為文多出新意其為矩度不盡依據
古昔而其意之所及逸氣橫發人皆喜之也有文集五卷梓行于時

林雍

雍字萬容別號蒙菴登景泰四年進士第初授行
人司行人以毋老上疏乞歸養天順辛巳母以天
年終雍持喪畢乃起供職成化甲申憲廟幸太學
乃上疏勸修德格天親賢講學以圖長治久安之
計未幾合僚推舉遷司正雍首勵清操聲動一時
先是諸行人出使往往以賄聞至是皆知愛惜名
節多選為監察御史者屬吏部考察百僚雍曰使
其不勝任黜之可也安能隨行俛首念脚色耶他
日吏部以為駕部郎中未幾雍亦上疏乞骸骨命
下欣然就道在京縉紳大夫皆相與歌詠其事送
之南歸雍至漳乃結屋龍山之阿日與學徒講明
正學其學以朱子為宗卒年七十五塋于龍山之
雍家不甚裕然而進
退取予皆篤于自信

林祺

祺字子祥世為文山人處士應元之季子方伯
訥齋之從子也嘗從里辟充邑庠生少豪宕不
羈處士及方伯交責之乃收歛身心力行孝交
母方氏沒哀毀骨立足不出門戶平居與人交
謙而不代立談之間洞見肺腑見四方諸豪雋
以學行稱者躬自下之正德壬申夏疾作告其
從父弟禮曰郡修志成深慙吾願所著漳獻備
忘可備參考但鄉賢一節當時吾曹不能備陳
以致有所遺落今郭教諭惠陳布政疊林郎中
雅時有入祀之機獨蕭義士景懋忠勇不下鄭
柵陳君用而文則過之此而不在俎豆之列何
以示勸吾殆不與矣請以予言告太守越十有
二日疾革又屬禮等曰貧而厚殮非禮也衣服
棺槨毋容過侈廳事置棺不宜當尊家有老父

縣志卷之八

人物

世

二

在棺宜置廳事右畔銘旌只書曰嗚呼文山林
子祥之柩又曰男子不絕婦人之手吾得正而
斃足矣乃辭室人獨處以待盡以正德壬申五
月乙酉卒壽三十六性喜讀書祈寒暑雨手不
釋卷訥齋多藏書讀之始徧尤善著述初朱子
作伊洛淵源錄楊月湖蕪嘗增廣之俱以為未
備復為續錄集南軒東萊象山諸先生行實與
朱子叙論名曰考亭麗澤錄又沂朱子以上若
豫章延平諸公以下若蔡西山至許謙諸君子
集其行實為考亭源流錄東溪遺事編錄名曰
高陳布衣學術之正嘗取東溪遺事編錄名曰
遺澤取布衣文集編次名曰文抄復為之傳而
各有跋又嘗取淳祐清漳志八閩通志名賢文
集稍加增損著漳獻備忘復索諸文集纂漳文
備忘又考歷代君臣賢否政治得失孔門弟子
所學淺深先儒門人所造高不編次成帙名曰

古今指掌錄又續修家譜以正宗支訥齋所著家範以篤親愛告族人曰此保族宜家第一義也棋閉戶著書人無知者既沒檢其家得七八種云

士行

宋陳玠

玠字待寶登神宗元豐二年進士第初調建之法掾知南劍州沙縣監泉州市舶門遷承議郎家豪於財父鍾愛二弟貨十萬餘輒推與之其弟璟與姪敦德孫師孟皆相繼登第敦厚宗說皆特科玠任新州教授其科第蓋蟬聯焉

陳諤

諤字昌國有至性少游太學累試不效歸以其學教授里人大抵以孝弟忠信為本初在太學奔父喪不踰月而至兄弟友愛不分居徽宗崇寧初郡舉入行諤為首授岳州文學子錫登進士第

黃碩

碩字若冲彥臣第二子也徽宗大觀三年以上舍生與弟預同登進士第初調建昌教授外臺交薦累官至朝散大夫年五十奉祠里居及卒郡守李彌遜祭以文曰隱居教授遠近慕之其陽元宗之流乎不慕官榮優游卒歲其馬少游之傳乎子淵激及孫茂先朴曾孫用之皆補郎官

李恂

恂字顧言性敏好學高宗紹興十五年登進士第任縣尉以捕盜賞改知晉江縣後知邵武軍以宮

觀致仕初恂登第與史浩同甲至是浩當軸累召不赴子必直必正皆以遺澤補官必直任興化軍

判簽

林宗臣

宗臣字寔夫高東溪門人以儒業登科官止主簿與汪叅政澈友善汪在烏府宗臣貽書囑之罷本州齋鹽為人風鑒見陳北溪趣向不九大稱之謂曰子所習科舉之文耳聖賢大業則不在是乃以紫陽朱文公所編近思錄授之

李時中

時中字守正登乾道丙戌進士第任轍所至以廉介稱由延平通守入監登聞鼓院遷軍器監簿除丞出知袁州秩滿除廣東倉俸錢不以歸家悉寄之庫

趙彥駿

彥駿登淳熙二年進士第知臨江軍好賢樂善郡人康庶精於天文彥駿折節事之及卒傾衣貲以賙其後所居門宇庫隘晚築小亭於湖上以詩酒自娛鄉貢士許葆光以詩美之云有官千里再分竹無地平畦堪種瓜子雋夫龍川令孫時翼廣州司理

潘武

武字叔允識性穎悟履行端方於書無所不讀與陳北溪為道義交鄉子弟多執經從游如進士趙希沅吳仲修皆出其門

趙希佚

希佚字佚道少力學不倦有文聲與黃學阜相友善嘗以書薦名漕臺試南宮不利改習詩登寶慶進士第調惠之歸善尉為人謹儉當官尤廉恪卒于官邑人感泣

顏復之

復之字子開登淳祐元年進士第有能賦聲試禮部尋補太學已而遷太學錄再調湖幹卒于官為人貌古和寡不苟訾笑然輕財好義表裏如一與三尺童必見肺肝葉侍御薦十賢于朝復之其一也

國朝郭舒

縣志卷之八

人物

三五

舒字端莊景泰五年進士第家易學初筮行人滿九載陞南京戶部員外即以母憂家居十有載郡強起之到京陞工部營繕司郎中成化二十二年擢知池州府舒為人古直剛介持已廉行事方人不敢干以私初為行人使蜀諭祭王以相禮之勞也酬以金幣不受繼使廣東布政使張某餽蠟丸十枚舒到家剖丸取藥內胎黃金即如數封固遣家人賁入廣還之又使陝西邠州禁茶知州王文槐白金一千兩曰此故事也舒曰非朝廷則例何謂故事請自我革之其在戶部時踏勘廬州泥泊中貴請佃皆不可惟以給平民在池州日以撫字為先往往留意學校農桑而催科諸政反若拙焉然亦未嘗廢也與巡按御史不協遂自陳致仕行李書籍外無長物焉他日有以煙蠓場獻者舒曰吾食煙蠓取數文往市得矣奚以此為終日端坐手不釋卷足不入郡縣門非有大賓客亦不出堂

序性好潔日盥頰十餘次其坐處几案必正書籍必整其所落髮爪皆紙裹以藏之而有敗書退筆亦收置篋笥中而不忍棄蓋其性度有常終身不改云

張綽

綽字本寬號克難軒成化丁酉以易領鄉薦登弘治癸丑進士授刑部主事歷陞員外郎即中當道每稱其練達明爽正德元年奉勅兩廣審錄順道過家宗黨有造大舟欲貨番者公大罵曰吾當白諸官事乃寢潮人有林姓者殺人當死密餽兼金數百因鄰人告綽求脫綽亟呼家人捕之其人乃逃去未及行卒于家

良吏

宋劉衍

街字成之治平二年進士為人器識博學初授英州推官時呂大防辟衍同孔平仲王祖道三人赴材識茂明科衍言時務諷及新法有司不敢取而歸諸司列薦知潮陽縣歲大歉發縣帑傾家貲運廣米以救之民得不飢由是衍之名益盛元祐元年改知新州以禦妖賊功加騎都尉秩滿詣京師會知杭州趙抃亦秩滿同日引見議青苗不合安石叱之曰汝等不讀書故耳趙訥未能對衍曰三皇五帝所讀者何書安石嘿然遂力致仕乞以所授章服賜其父鄉人榮之即居坊名曰元豐太守黃稹詩云榮躋五馬分南郡尚有雙親向北堂

李亨伯

亨伯字安正登治平二年進士第授福州懷安尉陞知東莞縣縣有盜累政莫敢誰何亨伯掩捕之遷知梧州興學舍立六賢堂俗用知勸知全州經理西原諸蠻威名大著終忠州防禦使初居母喪哀毀甚甘露降其庭樂朋人急為文有體尤長於詩為蘇文忠公軾器重

謝伯宜

伯宜字晞聖登熙寧六年進士第知湖州長興縣開水利蝗不入境諸臺以其事聞于朝遷奉議郎賜緋官至承議郎伯宜歷任凡六司議獻者四平反為多曾孫明之登第知邕州

林磐

磐字定國登元豐二年進士第任汀州教授知青州千乘縣時諸縣旱蝗獨不入青丘境嘗自為詩

縣志卷之八

人物

三七

八

天應閔不復鄉村開鼓桴○歷任知邵武軍巧祠

以朝散大夫致仕

顏敏德

敏德字克和登乾道己丑進士第知循州除邕莞安撫官至朝奉大夫父唐臣好善樂施贈朝請郎子幾歲並以澤補官邕數有峒寇敏德遇以威信卒不敢犯界

陳衡

衡字季平登乾道八年進士第初調高要尉以擒海寇獲賞改知寧都尉時留正為守薦除福建師幹遷知廉州陞辭奏差役之弊至郡再上章乞祠丞相京鏜曰此恬退之士也除宜州衡力申前請

乃得祠慶元初召至京著十論以裨廟議除知興化軍有携權責書求館客者衡曰寧以身當謗不以官物循人情樽節用度增糴備荒邦人立祠鐫碑子少清少時皆縣尉孫懋監淮西總司北軍

謝明之

明之字惟學承議伯宜之曾孫紹熙元年登進士第初試雷州教授繼通判潮陽攝郡三年尋知邕州秩滿乞歸所至皆有聲在以蕙平著家居以詩酒自娛與封州守陳經梅陽守楊承祖為林下三老奏補三子官義一知潮陽縣道一知程鄉縣德一迪功郎

趙善封

善封字德可登慶元二年進士第宰寧德縣課農桑崇學校延靜退無華之士為諸生矜式吏以催科引呈押輒斥去曰押一花字公家所入幾何民已不勝其擾矣乃具逋數立定限揭諸市門曰過限不納國有常憲民感其恩信課入以登邑鬻盜計戶抑配善封亟罷之民依山而居者以竹楮為業苦於需索善封樽節為之代輸民立祠以祀

黃朴

朴字文卿教授碩之孫彥臣之曾孫也以世賞補廣州懷集尉攝邑事或以少年易之一日寇至官吏失色朴調鄉兵自率禦之賊畏趨去以薦調陽江尉攝邑事邑大豪多甫福族持吏短長吏畏之或謁朴朴數其過申郡置之法一邑肅然胡尚書銓自海上召還取道陽江聞朴名曰當備為薦首未幾海寇劉承興犯高雷化三州且欲吞噬南恩朴即率客船十餘艘出港迎擊賊聞風宵遁改任

宰安溪崇學校課農桑被檄攝韶州不就秩滿倅邵武又倅福州兼西外宗正丞時師相梁克家召還朴攝州事及宗事二司公給一無所取力乞祠祿歸克家舉所知以朴為首而朴逝矣初留丞相為布衣時朴在惠陽一見竒之及為廣僉遂與受代不十年為禮部尚書其知人類如此子用之增城丞

黃煥

煥字仲宣少師彥臣姪孫也父預以文學行誼推於鄉登紹興第初任歸善簿以廉謹稱嘗攝尉獲盜當改秩遜之同僚遷循州推官再為廣東帳幹帥叅龔茂良以堪入清要薦之帥相范大成檄攝潯州再攝撫州皆有聲民懷之

縣志卷之八

人物

三九

楊承祖

承祖字慶襲汝南之孫也弱冠力學通百家書尤工於詩以祖澤補官調邕之理曹斷獄得情為郡守稱賞再調循州推幕於郡政多所裨贊改知安溪縣勞心撫字去之日邑人遮道借留者數百及再倅循陽父老迎而相語曰是前日清嚴推官也攝守惠陽得代送迎餽遺一無所受廣憲王涪首以廉吏為薦除知新州尋知撫州赴闕奏事以二廣便宜極言之上嘉納年方五十即丐祠既歸家與傳侍郎伯成孫少卿昭先陳封守經為真率會又作亭于城北稻田數區荷塘十里扁曰歸耕幅巾蕭散嘗自為詩云決意歸耕景最佳還珠門外足生涯數椽卜築欣成趣一水流通不用車負郭有田宜穡徑遠城何處不荷花柴門半掩誰來往幸有隣僧可覓茶○中一堂扁畝畝不忘君詩云一

官落拓幾星霜身遠朝廷心下忘憂拜黃書叨試
郡何慙白首未為郎雲山縹緲如招隱花木欣榮
亦向陽感激先皇曾賜對至今朝服帶天香○一
時吟咏甚富糾曹趙維為之記子思恭程卿尉思
安新懷
主簿

顏振仲

振仲字景玉奉議徹之長子也以祖澤補登仕郎
嘗宰安溪以趙忠定所書公勤庶恕四字鏡于縣
齋自警邑有陽嵩嶺為盜淵藪殺掠甚衆尉執平
民姜某案具振仲物色之知其庸作有主家識認
甚明遂得釋守游九功褒異其事及倅莆陽課以
羨聞尤篤意學校攝郡之日籍廢田于學是歲大
魁特魁皆莆人時論以為激厲之效時有旨調遣
招討司飛雄軍軍課于市乞增資糧振仲出撫諭
縣志卷之八
以倅廳官錢增給皆
拜而去官至朝散郎

趙善昉

善昉字文彬登慶元五年進士弟初調連江丞攝
邑事靡政不舉宰保昌委鞠劫盜疑非辜果得真
盜會有他警設伏浚河賊知有備而退倅潮攝郡
捐官田以廩士廩士德之秩滿還里上表丐祠乃
作詩以述志云功名付兒輩富
貴等浮雲○遂以朝散郎致仕

趙希佖

希佖字安道登開禧元年進士第調古田尉獲盜
十有七人或謂格當賞佖曰殺人以徼利吾不忍
也白之長官止坐其尤仕終沙縣丞希佖所
至必崇禮重賢尤尚廉潔男與併登進士第

趙彥彌

彥彌登寶慶二年進士第初調番禺尉歷古康法曹翁源令嘉熙四年鄉郡大饑穀斗直錢五百死者相枕藉彥彌惻然指私廩千餘斛日為一粥以食之不足則糴以繼全活數千人德之

國朝 沈源

源字宏鑑天順八年進士選纂修英廟實錄以清節著授南京監察御史時貴溪高公明掌都察院事喜源為人凡事經源裁決者輒稱可嘗差巡江號令嚴謹盜賊不敢犯考績之京因天變疏修德弭災十事曰勤聖學慎守成樂修省敷德澤優諫諍慎用人去冗濫慎刑獄節才力清屯田見者以為激源曰言吾責也矣以激嫌又言南京根本所在宜勅守備官練習軍馬科道官按時點視高縣志卷之八 人物 四

陳惠

公曰此非源不可時源考績歸既以命源源與諸貴臣共事一乘以法諸貴臣不堪交章誣以泄漏軍情貶知盧氏縣源到縣民悅其政恨得之晚巡撫都御史楊公方論奏旌擢源而源卒矣

黃燧

惠字啓順成化三年進士南京監察御史擢知江西廣信府以清慎勤作三字符先是府官私衙油燭需之門庫惠曰門庫燭公堂用之耳豈可入私衙即日止之太守衙壞吏請修葺惠曰毋以我勞民傷財但取小大反架而已巡行屬邑自齎糧食曰毋費民也嘗刊二程文集曰此道學指南也宜令郡人多見之南三載卒于官

熒字敦實成化八年進士授玉山知縣以治績著聞陞監察御史奉命往貴州雲南清理軍政不剛不許號稱得體陞四川按察司副使年力未衰以母老欲圖終養乞致仕而歸

施惠

惠字師僑應景泰七年貢優格任武強知縣清介自持門無私謁有劇賊入境官軍莫敢向前惠單車至賊壘諭以大義賊散去民有田地三百餘頃為戚里所有惠奏復之後以忤當道回家貧教授自給

文苑

唐周匡物

縣志卷之八

人物 四二

匡物字幾本明經匡業之弟嘗赴禮部道經錢塘江舟人艱其濟匡物題詩曰萬里茫茫天塹遙秦皇底事不安橋錢塘江口無錢渡又阻西陵兩信潮此詩見全唐詩話○後郡牧出見罪津吏遂以官舩渡舉子不取其直自此始也元和十一年擢進士第鄭澥為之首贈新進士詩曰元和天子丙申年三十三人同得仙袍似爛銀文似錦相將白日上青天○時知舉李逢吉後以王播代之初匡物未第時作古鏡歌有不知誰是孤光主之句歌云軒轅鑄鏡誰將去曾被良工馮金取明月心中桂不生輕冰面上菱初吐蛟龍父無雷雨聲鳶鳳空踏莓苔舞欲向高臺對曉開不知誰是孤光主○王播覽之曰異日當與此子作孤光主至播評文而匡物果中選乃作及第謠云水國寒消春日長燕鶯催促花枝忙風吹金榜落九世三十人名字香遙望龍蟬新得志九天勅下多狂醉驕

騶一百三十蹄踏破蓬萊五雲地物經千載出
埃塵從此便為天上人。及為謝恩詩詩云一
從東越入西秦十度聞鶯不見春試向崑山投
瓦礫便於靈沼濯埃塵悲歡暗負風雲力感激
替生草木身中夜自將形影語古來吞炭是何
人。播既得詩且弟泗以為忠孝之極唐興十
餘世而章人登進士第者始有周氏天子賢之
勅以其讀書天城山改為名第山遂號為名第
先生官至高州刺史

宋蔡瑗

瑗字希遽仁宗嘉祐六年登進士第官至朝請大
夫歷典五郡徽宗登極上封事言商三宗嚴畏周
文王無逸為萬世龜鑑上嘉納其言除江淮荆浙
福建廣南等路都大提點坑冶瑗以文章政事名
世而聲律尤長所著有鷺城集及古今名賢警句
行世五子登澄彭袞侯同領鄉薦六世孫盡忠奮
忠俱登進士第

吳桓

桓字孟文登元豐進士第熙寧間陳三要三術切
時務官至朝散郎桓高於文人爭慕之有文稿及
古詩僅百篇傳于世子南公嘗進中興北
廷錄二十事詔與特恩授弋陽尉不就

鄭公顯

公顯字隱之登乾道丙戌進士第調富沙戶曹秩
滿獻時事十論於朝除潮州教授以梁丞相薦改
知同安縣有惠政召監正奏院遷宗正簿時災異
數見應詔進三說其一指陳時政毋撫細故直書

事實無尚繁文此其責在大臣其一謂詞簡事覈
然後得以親覽而審擇之此其責在陛下上嘉納
之賜賚甚厚除大府丞兼刑修勅令進權刑部員
外郎兼權直學士院復兼祠膳主客等職初誕皇
孫公顯在玉牒所製賀表奏重華云怡神珍館詎
知天之非人而人之非天毓秀璿源果見子又生
孫而孫又生子遇會慶聖節有旨過宮稱壽宰臣
率百僚拜表倉遽就公顯索之諸作者若陳若樓
若蔡咸在列廟堂併屬合辭締思公顯表先成諸
公一辭嘆服陳中舍傳良有詩云自是春容風骨
好最於倉卒語言工又作賀雪表有待姚虞於玉
圃奉王母於瑤池之句蓋以重華比舜以壽成王
皇后比王母也衆服其工是時綸告褒嘉有兼掌
名表屬辭最工之語公顯屢求外補除浙右倉諸
公皆惜其去尋以姻黨引嫌易節湖湘未半期膺
召命公顯甫入脩門得旨先次引見廟堂方遴選

縣志卷之八

人物

平四

八

祠掖擬直玉堂既而語泄改除侍右郎中俄兼右
司進左司兼提領左藏封樁庫兼權檢正一歲四
遷時論躋之廟堂每有表制多出公顯筆如賀壽
皇生皇孫表云千年生一聖人固曰非常之慶一
日見三天子尤為甚盛之休其切當皆類此俄有
旨與祠公顯之為文有法度尤長於儷語有文集
十秩時事論十篇語錄等作傳于
世子祚槐桂孫崧皆以公顯補官

陳經

經字叔綸弱冠登淳熙進士第調廣州司理辟新
興令改福清首以教化為務倅循州知欽州封州
嘗學文於曾樽齋丰雅得其妙尤工於詩膾炙人
口時郡守趙汝諱教授陶孫皆推服之巽齋危
稹讀其詩知其江西派也威惠廟建通仙樓衆屬
經記經對客援筆不辭首聯以丈夫當廟食仙人

好樓居為對其工敏類如此自封州秩滿歸恬於仕進雅以文字為樂有德齋文集子稚窳以經致仕恩補官

宋聞禮

聞禮字叔履登嘉泰二年進士第授叙化二州教授歷知海陽縣有易禮記詩解行于世

趙希濤

希濤字清甫父師介通經術雅有大志教子力學希濤少以詞賦名兼通周禮後以周禮薦胄監入宗庠屢以經義詞賦占前列由內舍試上舍皆入優等紹定己丑廷對乙科調容州教授卒于官弟

希絜取應登第

縣志卷之八

人物四五

吳儼

儼字清臣兩請鄉舉有聲又請漕舉及同文館舉學者師之號省齋先生著述甚富援筆立成皆極精妙與陳知柔林光朝諸公為莫逆交知柔嘗擊節稱賞謂其貌古心古學古文古使其閉門著書當不在揚子雲之下三山林子晦亦嘆其為天下奇才所著灌口真君祠堂記與其他文膾炙人口有省齋集行于世

國朝謝璉

璉字重器宣德二年廷試賜進士及第第三人授翰林院編修遷侍講以能文稱上治安策十五事皆切時政陞南京戶部右侍郎卒于官

高琅

琅字瑩夫十一都人訓導駢之子幼穎異年十六補郡學弟子員博極諸書為文章典雅奇麗為提學副使姚公謨劉公王所器重登嘉靖丙戌進士第授廣州府推官卒于官人惜其才去

風節

宋周純

純字潛文英宗治平四年登進士第知建安縣時賊首廖恩擁衆剽掠南劍州純募敢死士千人蹤跡賊所日夜薄戰屬朝廷招安後廖為延州部由純以事至延廖曰是窘我者也我三日不食詔書少緩死是人手決矣便任密州普寧陳州項城二縣元祐初翰林蘇轍舉純善治財賦自御史臺主

縣志卷之八

人物

四六

簿提舉江西常平救荒多所全活歷京西運判淮西提刑入為戶部員外郎出知應天府以直秘閣致仕居家不置田宅構堂於東湖僅蔽風雨弟綸亦登第官至員外郎時人有大小戶部之稱孫邠大庾簿

李絳

絳字伯華登熙寧六年進士第初知貴州秩滿除編修國史出為福州叅議尋知建州歲荒捐已俸糴米以賑濟左翼軍叛絳出誘諭之軍皆庭拜子寧國朝奉大夫光國承議郎安國承奉郎孫可復可待可行皆即官

吳與

與字可權 登元豐五年進士第歷四會餘干
令初四會民編竹為屋與始教民陶瓦以絕火患
餘干儒學失振與徙琵琶洲後登科者接踵嘗論
事於憲臺臺官燕若蒙厲聲曰若欲效漢唐令長
為政耶與曰固願學之恨不至耳燕為改容通判
潮州故人張天覺當國或諷與宜往見與曰吾昔
遇張公放逐中相語無非忠義事今乃逞身求進
耶凡歷七仕悉以俸餘收書分經子史及星曆醫
卜各以類例餘二萬
卷有文集藏于家

黃京

京字華叔登紹興二年進士第初在郡學與高登
相友善至是又同擢進士第登調桂嶺簿京調連
州戶曹並以清白聞秩滿歸里聞登以直言斥恬
無仕進意時年未四十性樂施予所識闕乏者厚
縣志卷之八 人物 四

賙之鄉人呼
曰黃長者

顏幾

幾字子治知循州敏德之子也歷任多在海外以安
黎蠻海外之民以爺呼之後除瓊莞安撫請奏變
差後為崔後及請舉士照四川例與
殿試陞等推恩士民懷之立祠焉

蔡如松

如松字勁節 莆陽學士襄之族家于龍溪慷
慨有大志讀書於岐山仙亭巖與顏師魯友善同
預鄉薦吳獬以文鳴與之辯論不為屈乾道間特
奏名調東莞簿歷四會令新興推官晚節著書不
樂仕有漳南十辯行於
世及歌詩記文等作

余壽

壽字若蒙登淳熙十一年進士第授惠尋二州教授進聖域記特授浙西倉幹復進皇朝職志高宗政範差監樞密院激賞庫進資時十論伏闕上書論韓侂胄又上書力沮和議復為古鑑錄以進及上書論邊事進天文狄地例增釋紀年錄雜論五音姓譜哀前後上書曰代庖集骨鯁集自號淡軒

義勇

宋鄭柎

柎青焦人政和初應選補武學生特募良家子從軍柎往廊延路總管劉延慶軍投効用尋有旨從軍不用東南人乃於鄜州洛川縣置產從劉延慶麾下第十一將鄭建雄赴大理河與西夏接戰多斬首虜功補承信郎賊平授汀州黃土寨巡檢捕獲王猪奴賊全火轉承節即用憲司奏辟泉州興化軍吉了寨巡檢會黃土寨兵黃勝等叛殺寨官憲司以柎前任黃土獲賊有功復差權黃土巡檢黃勝素懾威名閉寨自焚柎建寨柎招集軍士宣和七年金盧寇邊柎赴樞密院自陳乞發赴河北軍前任使遂隸統制鄭建雄麾下充本軍將領高宗為河北大元帥舊名犯御諱始改今名前後累立戰功轉至修武郎時召河北兵馬入京守禦靖康元年十一月二十八日虜逼都城柎為四門都巡檢領兵救亂力戰死之紹興初劉光世請于朝子綸以父沒王事授承信郎

縣志卷之八

人物 四十八

顏公衮

公衮字鼎卿青焦人以父澤補官初調循州興寧縣令紹定門兇賊陳三鎗羅動天迫興寧境或曰

寇至盍去諸公袞不可出縣與賊遇下車諭以理
義賊怒公袞厲聲叱罵之遇害與寧民哭之哀為
立祠朝廷嘉其節
贈員外郎官其子

元蕭景懋

景懋文山人景懋故儒者後至元間南勝李志甫
作亂景懋與兄佑率鄉人據阻立柵以自保旁里
有為賊鄉導者引從間道入遂破柵景懋被執使
拜景懋曰汝賊也何拜志甫意欲降之以為民望
景懋罵曰逆賊國家何負汝而反汝族汝里何負
汝而坐累志甫謂其徒曰吾殺官軍將吏多矣至
吾營時皆股慄未有若此餓夫之倔疆者察其志
終不為吾用留之徒取辱耳乃令縛之樹剗其肉
令自啗之景懋且啗且罵曰我食我肉不若汝賊
行將萬段狗彘不食志甫怒斷其舌以死事聞詔
縣志卷之八
褒旌之仍給
錢以供葬事

陳元善

元善字長卿五世祖諱世英與北溪先生為從昆
弟世英生剛剛生沆宋端平六年進士官臨安府
通判沆生森咸淳六年進士授潮州法曹參軍未
上而宋亡元善森之孫也自北溪蓬洲遷於馬岐
白石能以詩書濟其世禮訓肅其家誠信乎其鄉
至正二十七年海壩逃兵作亂兇渠薛均祥執元
善并其妻孥欲脅之以上汝頸矣元善罵曰吾所畏者
我則生不從我刀上汝豈能久生耶賊殺之其妻
義也不畏者死也汝賊皆不屈而死今嘉靖五年
郭氏子光遠光達光迪皆不屈而死今嘉靖五年
知縣黎良因衆議請於巡
按御史景仲光立祠祀之

羅良

良字彥溫其先汀州長汀人少負俊才善謀畧至正間賊蠡起乃傾貲募衆以倡義初從大將平南靖畚寇李志甫功居最授長汀尉隨因擒龍溪反囚奉命鎮漳既而南靖畚寇若吳仲海陳甬車李國祥等江西巨寇若詹天驥李大曾飛林國庸等潮賊王猛虎陳國真金榮等後先竊發或屠掠鄉村或攻陷城邑侵擾無虛歲良應時討平之累建義功又轉漕遼東以給軍受知主上由行省叅政進爵至晉國公其為政也以敦本善俗興利釐弊為先公餘則親書史充精于墨法可謂濟武以文矣後陳有定據福建郡縣望風投款良獨貽書責之有定怒遂大發兵攻陷漳城良自以守土大臣義不可屈率敢勇士巷戰死有定義而瘞之

縣志卷之八

人物

辛

黃榮

榮字惟達預七世孫善鈞貫兵書至正間畚寇李志甫攻城榮輯義勇平之省臣上其功授神山懷安大使秩滿致政歸賊復作榮率鄉人立柵以自保賊不敢犯界後分省策功錫命終不訖

國朝六生

吳性原陳應宗林珏鄒君默曾廷瑞一人姓名忘之龍溪人漳州郡學生革除年郡學教授陳思賢為舊君位哭臨如禮六生毅然從之思賢繫入京六生成以身殉嘉靖四年提學邵銳撤淫祠陳公于正侑以六生

唐孟元孟遠

元遠兄弟二十七都霞裡社人素以義槩瞻畧稱
正統十四年遇沙縣反賊鄧茂七作亂延寇郡邑
災至本處古蓬社值小橋弗得驟進兄弟夾橋力
拒之擊傷頗多自辰至申弗得休息力不支而死
時鄉社數千餘家俱賴得渡鎮溪一無所掠二人
之力也及賊去哭而義之相與收塋于西墩後墳
地見侵于人子孫力微不克復嘉靖三
年提學邵公銳為改正之仍建祠焉

隱逸

宋謝修洪文用石蕢

三人隱於青焦文圃山地介漳泉間自廣明西幸
人多忍耻以事虜獨謝修道迹必俟光啓廻鑿乃
出尋擢上第五季瓜分仕者各擇其主洪文用終
不為時屈石蕢以世胄仕鯁論忤時浩然而歸三
縣志卷之八
家相望數百年清風昭世嘉定間鄉人廣
倅楊志作三賢堂西蜀何致一為之記

寓賢

宋楊令問

令問其先蜀人也大宗淳化三年登進士第一甲
歷職方員外郎真宗咸元景德間北虜寇邊選任
防禦重書褒寵者三仁宗天聖元年奉旨居漳弟
令緒歷官至奉禮郎令望不願仕封泰岳先生五
世孫友諒應博
皆登進士第

趙師楷

師楷字清之先世尚行居三山父伯壽任漳幕
因家焉師楷學詩於黃樵曾監南宮俱在首選

登紹興第授南安簿陞懷安丞兩奉嶽祠或勉
之始謁選授浙漕幹官有誣屬邑令者漕使欲
効之師楷曰若憑單詞得無冤乎訪之果誣也
改知湖潭以尚書徐應龍薦有旨召對首論邊
防次論募兵寧宗曰誠當今之急務除提舉左
帑改倅惠陽多異政守撫州慎防盜民賴以
安秩滿除廣東市舶革無名和買之需遂為計
度轉運使攝帥事被召首陳正心之說除大府
丞未幾除直秘閣知建寧府進秩除寶章閣出
帥廣東卒于官丞相菊坡崔公與其同年相知
素深作詩哭之詩云天南重臨遺愛猶
存蔽陰鼓角三城新令肅袴襦萬井舊恩深
養民但積和平福蒞事常持敬簡心遠業設施
殊未老巨川東逝日西沉○又云老來心事向
誰論每見移時話肺肝黃甲同登今有幾白頭
相對古來難死生轉盼星辰墜聚散酸心幕雨
縣志卷之八 人物 五三

岳玘

寒病稟不堪聞楚些海山望斷淚洸瀾○人謂
菊坡之詩皆實錄也子希璫希瑣希玘希璉希
玘孫興映並以
父祖澤補官

此武穆正之孫也奸檜時武穆以功高被誣二子
霖震謫嶺南後移于漳因家焉孝宗嗣位首加昭
雪復官爵錫冢地祿其子孫旌以廟貌霖官至朝
議大夫兵部侍郎以敷文閣侍制出為廣東經畧
安撫使子珂尚信王宮之女官至尚書今居江州
震官至朝奉大夫戶部郎中出為江東常平使玘
震之子也任汀州連城尉而卒
子覲以尚書澤為蘄州察推

周佑

佑字于一 其先建陽人五世祖延宋武翌
大夫廣西路鈐轄闔門宣贊舍人後自建陽遷延
平其父益才元未試吏家于漳佑少端重未既
即知讀書父不欲其出外乃開塾于家延師以教
之甫成童通四書五經傳註及冠治舉子業會科
舉中輟而業無所用乃博覽兩漢諸子百氏韓柳
歐蘇諸大家制作學作古文往往雄深雅健閩海
僉事有左姓者督師漳南佑廼撮取邊事顛末題
曰邊臣近鑑以獻左讀之曰史才也薦為同安文
學且進其書于朝以備國史編錄由是館閣諸老
皆知佑名靖州推官詹廷綱以愛女妻佑至正七
年重復開科佑與門生林弼同舉浙闈時制取二
十八人佑第一弼第七及試春官弼登進士第佑
不利翰林群公將薦佑史館佑以親老辭不就歸
至延平聞父卒于漳遂奔喪詹氏在道卒抵家母
卒未幾佑卒隨之矣佑卒無子以弟佐主喪事邑
縣志卷之八 人物 五三

孝行

宋王梁材

梁材字廷衿元豐八年進士歷任至提舶上書陳
時政闕失乞省後宮及行幸不急之費上嘉納之
特轉兩官梁材自以母老不欲遠去嘗上表
云聽異鄉之鐘鼓益助悲鳴就故國之蒲魚聊供
反哺。上不允復移利州路常平使未幾攝成都
府事乞就養未至家母卒廬于墓側服闋提舉廣
南坑冶上慰勉之謂事竟當有以處卿特轉朝散
大夫廣東運判專功措置坑冶歿于官子元忠官

至通直郎知高要縣以行經界有條理辟陽春令
專行南恩二邑經界孫衛卿乾道間以其祖蒙徽
宗宣賜御筆手詔
授進特免文解

黃槩

槩字平叔其先光州固始人避地入閩與福之鳳
栖同族分居于龍溪槩好學力行嘗語人曰學者
學為忠孝而已不爾雖讀書與不識同父嘗有疾
傾家貲求醫或勸曰不為子孫計乎槩泣告曰苟
疾愈雖子孫飢餓吾亦無憾父忠助享年九十六
母鄭氏年九十九父將易箒命之曰為人子若爾
者少吾頤為爾子以報言訖而逝時槩安人將免
身復感夢曰吾某月某日某時為爾子及期生少
師彥臣封承議郎賜緋累贈朝散
郎子孫登科不絕迄享孝行之報

縣志卷之八

人物

五四

胡景清

景清因元兵下漳南時五歲隨父母逃難倉卒失
其母景清長知學每念母涕淚潛然下一日辭其
父抵幽薊尋馬忽於薊市遇其從叔胡巨川知母
已至薊而未知其處踰年始得之蓋母子不相見
者四十餘年矣事聞詔
旌表之仍給驛以歸

國朝馬喬

喬弘治十二年貢任南雄始興縣學訓導始興新
創縣喬勤教誨諸生多有成就家居事母孝母患
目痛中帕不敢近喬為舐之日數次
母目為愈不幸卒於官士夫傷之

王彞

彞字秉元號琴軒王魯菴之子父患痢効屢黔婁
故事母病眼及患瘡吮吮無難色他孝行甚備弘
治中有司上其事詔旌表其門

蕭譽

譽給事中璿之子也璿卒于官譽五歲撫柩哀臨
鄉人異之及長性果純孝事三母如一嫡母陳氏
病癰譽吮之愈庶母阮氏楚捷譽承顏跪受起敬
求歡阮終感悟慈愛如已出遇風雨輒至父墳父
司諫坊頽有司謂蕭氏有子也修之初成西隣失
火延燒譽仰天號訴火遂滅人以爲孝感致家敦
睦之行洽於宗鄙知府張公鵬
以其事聞朝乞旌表之未報

方安榮

縣志卷之八
安榮十一都平林社人家窘甚素不知書宰猪為
活母陳氏年將六十思無為養每日割所賣肉數
兩以資母飯母病又割股以食之
鄉人稱之立貧而能孝四字於門

李俊

俊九都人性至孝六歲母潘氏寢疾諸醫莫療俊
日夜憂苦聞其祖父良嘗割股愈母疾乃默禱
天密剖股作羹以獻母疾遂愈嘉靖五年鄉人舉
其事推官黃直題其門曰奇孝後四明豐熙謫戍
鎮海過其里歎其祖孫一律易曰世孝俊幼習經
業長益修行提學仁和邵銳臨海高貴亨尤加崇
尚界衣巾肄業
鬻泮以勵風俗

宋列女

陳氏

陳氏田家女也家于赤嶺慶曆間父病藥不能療女年一十五默禱于神取心肝為饌以進父食之愈當時鄉人進士陳起嚴林文煥相與白于郡郡倅林有宗表其居曰旌孝坊縣令傳天麒為書其事

于石

蔡氏

蔡氏田家婦也家北門二十里熙寧間其夫日與諸惡少游蔡屢止之一夜夫自外携財物以歸詰所自得夫詭辭以對既而連夜如之蔡謂曰若為盜乎當亟止不止吾當白于官夫為數夜不出既而所與游者群來相與招致其夫蔡氏力抱夫腰不聽其行其徒乃散去後夜衆自外暗與為約夫

縣志卷之八

人物 五六

應之蔡覺走呼於道夫不返蔡因揚聲大罵欲召鄰甲捕之其徒懼又散去夫屢毆蔡蔡持之益堅他日其徒敗露皆遭刑戮夫獨免郡人李大方特為之傳三槐王鞏元城劉安世諸公皆有題跋

史氏

史氏顏頤仲子興祖之妻宋相史彌遠孫女也入顏氏門克盡婦道姑病史氏憂形于色日侍左右湯藥躬奉衣裳躬澣姑浹泣盡哀喪葬未嘗踰禮景定元年事聞封孺人號曰孝婦

陳氏

陳氏黃預妻陳諫議師錫女也政和間預為監察御史以直言忤蔡京貶知邠州宜祿縣以卒時陳年尚少有欲強委禽者陳氏覺亟買舟携幼扶櫬航海而歸忽風濤作覆舟彷彿間若有物救之者

及歸經紀其家義方教子人謂無陳氏則無此族矣子繡五舉免省孫樵仲杰樵相繼登科識者以為陳氏節義之報

林氏

謝婦林氏女也年十九嫁謝氏踰年而夫卒無子父母欲改嫁之林氏泣曰吾得伯仲子立嗣足矣欲使他適誓不敢奉命也寡居六十年而卒宋嘉熙間邑宰趙絳夫即墓立碑郡守李韶書曰節婦林氏之墓

王氏

王氏蘇宋傑妻青焦人年二十一而寡父母以夫家貧欲奪其志時方娠指腹誓曰生男耶守男生

縣志卷之八

人物

五七

女耶守女死不事二夫父母怒不與往來既生男親意猶未解不聽歸寧者七年及男長成乃曰吾今聽汝矣鍾愛如初孀居八十五歲而終男曰珪習舉子業孫竦慶元五年進士竦子溥嘉定十三年年進士

崔氏

崔氏蜀郡人知學能文黃彥臣之繼室初彥臣取陳氏生七子繼娶崔氏生二子九子崔氏均愛如一不以前後而二其心每見諸子必教以為忠為孝為廉與勤無為門戶蓋諸子皆唯唯奉承惟謹人謂黃氏諸子皆有成立雖彥臣善教而崔氏內助之功不可誣也

元列女

蔡氏

蔡氏陳端才妻蔡廣瑞女也名三玉家灣頭里至元間盜擄柳營江掠灣頭里其夫端才竄去三玉與夫妹匿神祠中盜入祠斫夫妹見三玉美驅而往與鄰婦歐氏同納舟中三玉故以水濕衣至柳營江盜欲污之三玉詒曰吾衣濕頭得更衣而從女盜往取衣三玉投入水中死盜駭曰溺者必躍乃以長竿絡釣以俟竟不躍歐氏脫歸言狀甚悉其父廣瑞避盜亦在舟中越三日屍浮傍廣瑞舟撥去復來廣瑞乃移舟上流屍亦逆流而上如是者三廣瑞怪而視之則其女也乃具棺收斂以歸福建僉憲左答納失理以聞詔旌表其門復其役仍給錢以葬

廖氏

廖氏魏亦顏妻東岡洲人亦顏故莆人元初游漳廖氏之老悅其才羨以女妻焉遂家于漳而迎其母方氏以來未幾亦顏卒廖氏年方二十四姑年五十五子興嗣方七歲時元初代宋宇內驛騷婦姑母子相依為命廖氏扶老携幼轉徙村落間往往食或不繼里老嫗或導其改適廖氏感泣截髮自誓勤紡績忍淡泊以奉姑教子為事大德間姑年八十有六廖年五十有六子興嗣亦年三十有六興嗣能左右奉養以盡孝道鄉人羨之乃以狀聞既覈實詔旌表其門

林氏

林氏郭德明妻林全女也名佛奴字從一全故福清州平北里人家世業儒教授鄉里至全始遷于漳時德明喪父事寡母以孝聞全以其女歸之夫妻相敬如賓生二子一女不幸德明卒林氏方二

十七歲長子熙方五歲次子玉方三歲女方七歲而姑年已老父母以其家之貧而口食之難也欲有他圖林曰婦人從一而終者也與其改嫁得富而孰若守貧得死而正且吾姑年老矣吾豈可背吾姑携幼稚改食他姓哉父母義之而止至元丁丑南勝○即南靖○縣黃冠作勢張時城郭空虛戰守無備城中人往往出外以避時姑適卧病或勸同往林曰姑在將誰與守若捨姑豈容獨生既而賊潰姑婦俱無恙避去者義而服之至正丙午秋陳有定取漳州右丞羅良巷戰死亂兵四掠執其孫惠林冒白刃以往堅執孫不捨兵欲斷其手林曰手可斷孫不可捨兵怒以刀斫其手執愈固兵乃舍去孀居四十六年始終無玷

陳氏

縣志卷之八

人物

五九

陳氏德金字怡情綠洲陳碧山之次女右丞羅良之繼室也素執婦道至正丙午陳有定攻陷漳州良因謂陳曰吾守土大臣義有死而已汝可以無死矣陳泣對曰君既能與國同存亡我必能與君同生死志豈可他奪哉良遂率義兵迎戰死德金亦率丫鬟投入後園三尺魚池中蒲伏而自盡焉

國朝

黃氏

黃氏蔡安繼室黃思甫女也名妙觀安於元至正丙午拜潮陽令道過于家時羅右丞據有全漳有定遣師取之漳人為城守城破右丞巷戰死其妻陳氏曰德金與二丫鬟皆赴池水死陳兵掠守城者時黃氏年方二十八安倉皇與訣曰我被掠生死未可知汝能守志為上必不得已亦須再適

人妙觀吞曰君薄妾甚矣我聞烈女不更二夫我豈可再適人乃剪髮以示安安果不歸妙觀紡績教子雖他有所推奪終不食言入國朝來洪武二十三年有司以聞詔旌復其家

劉氏

劉氏名柔玉尚交妻劉廷高女也有賢德年二十嫁尚友未及一載而尚友卒漳州衛指揮甘斌聞其賢遣人求為配甚切姑以劉早寡且甘為衛帥欲許之劉氏以死自誓貞白一節始終不移

李氏

李氏名淑明莊士因妻李克旺女也姑沈氏患風痺敬養無怠夫不幸有惡疾罄奩資求醫醫不痊而卒父欲嫁之淑明不從奉其姑不少衰姑沒貧不克塋停柩在堂正統己巳歲強盜寇掠鄉里淑明服衰麻僻踊號動其聲聞于外強盜聞之過其門不入而去賊平鄉人憐其節義相率為營塋焉

縣志卷之八

人物

李

陳氏

陳氏名正字淑德林瑞儀妻陳克聰女也年十八嫁瑞儀甫七月而瑞儀卒持喪三年哭泣哀毀幾喪明時節及諱辰含哀終日事舅姑盡禮內寢有樓一日登樓見夫遺服在焉忽傷感涕泣夫足而墜聲聞外寢舉家驚視見墜簪深刺入地而肢體無恙問之則曰恍惚若有所乘而下眾驚異以為是有默相之者孀居七十餘年卒

周氏

周氏陳子容妻周正女也幼讀孝經及小學書
能知大義甫笄嫁子容二十五而子容卒子浚
生甫三月周氏號呼撞跌而傷其手三年喪畢
人不見其笑語及喜容日閉戶紡績凡疎戚及
外姓不輕與接浚稍長即遣從師夜則親課讀
誦有過差不惜楚撻既而遣入郡庠未幾食廩
弘治七年應貢入京師廷試居優等授博羅儒
學訓導迎周氏就養十四年有司上其事三覈
實詔旌表其門

戴氏

戴氏名祐姐立孔文妻戴奉運女也永樂甲午夏
孔文暴卒祐姐年方二十哀慟不止服除母方氏
欲奪其志祐姐不從母密受
鄉人之聘祐姐投水而死

縣志卷之八

人物

卷之八

鄭氏

鄭氏名順常吳可贊妻鄭文耀女也嫁未踰年
而可贊卒將營塋謂其姑曰乞為双壙姑不聽
翌日以告其父母父母曰汝年尚幼胡為出此
言順常戚然而歸家人懼而防之乃飲藥死卒
合塋焉

涂氏

涂氏王廷思妻涂子衡女也少喪母父教愛倍
至及長擇所宜歸而為遲回者久之女年二十
一矣或謂郡庠生王廷思可乃歸廷思廷思祖
昇撫州守涂氏事舅姑如事父母以孝稱二十
二生子津二十三生子淵淵生有二十日而
廷思卒每哀至輒號哭殞去久而復蘇時停柩

在堂未克歸壙忽溪水暴漲舅爨急奉神主及携二孤走高亢地以避涂氏誓與柩同存亡獨立水中一晝夜幸而水落俱無恙自孀居以來含哀夜績两眼積淚成疾正德四年有司上其事于朝乞旌表之未報

林氏

林氏名淑瑤貢士莊同妻林俊禮女也莊同會京試卒于途時淑瑤年方二十五生子弼僅週歲計至淑瑤哭欲死舅姑初憐其少諭使改嫁淑瑤泣曰夫亡子幼豈可易心願終于莊氏既踰年舅姑有季女長成贅顏氏子元衷于家欲得同分田產托以出入不便迫令改嫁且奪其子弼乳于他人又遣使獨爨異以移其心淑瑤操愈勵舅姑故以危言與誓曰汝不嫁須待我掛麻燈母子乃得復

縣志卷之八

人物

六十一

初淑瑤日拈針指及紡績以磁鍋煮粥自食飲歷二十餘年而志不衰既而季女及所招壻皆不幸暴亡且無後淑瑤男長成已受室矣猶有舅姑誓言在耳不敢同爨又踰九載舅姑相繼亡母子始復初焉乃令子弼賣其所有業以葬舅姑曰莊氏門風不可自我壞也年八十有五

鄭氏

鄭氏蔡朝靜妻年一十七孀居傭績撫孤誓不改適時伊母陳氏陰受別聘鄭氏遽怒斷指長哭竊自縊幸伊夫弟張氏往救脫死是以名節著聞嘉靖十四年有司白其事以聞未下

朱氏

朱氏東山黃衷誠妻時衷誠之京卒于途朱氏年方二十三得訃哀毀弗自勝遂絕食越數日而死

鄉人咸服為夫之死義云

鄭氏

鄭氏顏波妻也年二十四而寡舅姑繼沒門至五喪鄭氏盡產而殯葬之父母憐其貧欲奪其志鄭氏輒哭不食以死自誓今年七十餘不改其初嘉靖十四年有司上其事以表之

葉氏

葉氏吳華父妻家甚窘每得一食即忍飢以食姑冬被無絮則抱姑足以身覆之其愛姑之誠真如慈母之於子也今年八十孤貧自守終無怨言

林氏

縣志卷之八 人物 六十三
林氏蔡子善妻夫故誓不他適嫡姑溺於諸女每逼改嫁不從以死自誓庶姑知其必死每同寢處防之特夜庶姑酣寐密起持刀自刎而死有司白其事旌扁貞烈劉子祭曰予嘗悲夫大道不行實愧吾人矧望於婦人方氏之遭寒也清言欲奪諸守乃遷奮劊以示不辱烈哉氏矣實錫見于我漳矣論定以扁行將旌獎之典慰爾靈矣嗚呼天下無道道在婦人吾于是三復仰嘆而莫以是

由宋入

國朝凡幾代得烈孝節婦二十四人采擇紀載將以風教焉

義門

國朝蔡豕

豕四五都人治家嚴整嘗立家法數十條鄉族矜式子五人迪遠迨迨選孝友深至守家法益篤合內外長幼五十餘口同居共爨一錢尺帛不入私房至於娣姒亦各相雅睦庭無間言自豕至曾孫一桂且四世義讓之風流于遠邇正德嘉靖間鄉耆相繼言於郡縣推官黃直署其所居曰義門巡按御史聶豹提學副使高賁亨按部命有司具禮即其家獎勵典數映禔鄉閭景企郡勒其名於旌亭善

尚義

縣志卷之八

人物

六四

宋顏唐臣

唐臣青焦人里有綠石渡潮平可舟潮退行者還寧甚苦之舊有童謠云渡不艱待三顏唐臣曰是吾責也乃於北涯輦土填淤鞭石為堤從地跨石長二千七百八十八尺作垂虹亭以憇涉者子敏若復築南隄至新亭凡一千九百尺歲久淤深孫戴復砌石增高建庵於憇亭之側謠言果驗役成里人祠焉

陳湜

湜政和間嘗有牙媪遺珠於其門莫記其所久之媪過其門四顧若有所物色湜呼問之媪曰嘗遺珠為主迫取雖市屋鬻女度不能償湜曰第言其狀當為汝訪求之媪以實告湜全歸之媪驚喜呼

為父拜謝而去里有喪多假婦女首飾繪絲器皿以事莊嚴有遺白金器者湜因往吊見而拾之爰問掌事者器皿有遺否掌事數人方倉皇求之未得湜即出於袖中歸之鄉人咏嘆不已湜嘗夢人告之曰汝壽終七十二後享八十四蓋陰德之報也

陳昌祖

昌祖字世長少力學不墜箕裘樂於周急淳熙甲午郡大飢昌祖於郡城四門日為糜粥以濟復予之人五十金全活甚衆

國朝黃秉蘭秉衡秉遜

秉蘭三人二十一都山美人懷安大使榮之曾孫卿進士璧之從弟兄弟好義天順間漳大荒共發粟千餘石以濟飢餒之民有司上其事朝廷詔立石旌表其門

縣志卷之八

人物

六五

郭秉敦

秉敦二十八都玉洲人正統十四年鄧寇攻郡城秉敦運私米千餘石助官府防守寇滅朝廷命立石旌表其門

周世綱

世綱一三都海滄人正統十四年鄧寇攻郡城世綱運私米四百餘石助官府防守寇滅朝廷詔旌表其門子朝恩弘治中累以家丁擒海寇功著于時

道釋方枝

潜翁

潜翁隋開皇中鍊形於石壁山
養白蝦蟆以自隨後不知所終

白衣僧波謙

波謙開元寺白衣僧嘗遊石壁山見二貧士對奕
就之化為雙鶴冲天而去餘一碁子取而咽之因
此辟穀石門洪覺範大覺璉有詩
送之覺範詩序謂不食四十年

僧義中

義中福州人或謂出家開元寺俗姓楊年二十七
削髮具戒初參石鞏鞏常張弓架箭以待學徒師
詣法席次鞏云看箭師乃披襟當之鞏曰三十年
張弓架箭只射得半箇漢及見大顛顛曰卸却甲

縣志卷之八

人物

六六

胄來師退步而立由是深造其妙會昌五年太僧
師乃入三平山初至九層巖山鬼穴前卓錫而立
化成樟木號錫杖樹次夜衆鬼昇師投之深潭及
還見師宴坐復以龍昇師至瑞龍百丈滌纒石沉
之復如故由是驚服乞為架院願師慈悲閉目七日
院必成師許之未逾五日師忽開目院已成唯三
門未就衆鬼奔走其不逮者化為蛇虺有一大魅
身毛卷起師戲擒住隨侍指使曰毛侍者然後初
田聚僧徒焉大中三年佛法復起刺史鄭薰奏賜
廣濟大師咸通十三年十一月初六日集門人曰
吾生若泡泡還如水三十二相皆為假偽汝等有
不假偽底法身與太虛等無生滅去來之相未嘗
示汝臨行未免老婆閉
目長嘘而化壽九十二

僧清鎔

清鎔本縣人見泉州睡龍有悟爰自淨衆罷入山
山過芋溪石橋遺偈曰世人休說路行難鳥路羊
腸咫尺間珍重芋溪溪畔水汝歸滄
海我歸山乃入湖頭山坐磐石而逝

國朝林存祥

存祥深於醫道切脈決人平危遠近應期不爽用
藥不拘方類惟詳性味妙於變通就醫者無不效
人敬重之如神南靖卓縣丞有疾診之曰明年五
月五日午時卒東門黃仕傳六月請飲酒無恙診
之曰明年此時請我不來矣人以為戲後皆如所
言又長於星命所發多奇中尚書潘公在郡庠時
存祥課其命曰歲星度駕平生足履王庭後潘公
歷仕兩京位登八座未嘗一涉外任人服其精喜
積陰德不乘危射利人無貴賤貧富苟以疾告不
擇所向治療必盡其心而後已故人咸德之子坦
縣志卷之八 人物 六七

和坦明能繼其
術亦以名醫稱

龍溪志卷之八終

龍溪縣志後序

嘉靖十有三年六月辛未授
期會簿書未皇禮樂惴惴奉
提學潘朴溪公太守陸石里
公命屬年君子李氏愷暨鄉
賢者白石林公魁空齋林子

龍溪志後序

啓定局東井刪舊志繁蕪庶
戍事事越七月丙寅朔竣事
翻帙縱覽之龍溪自周匡物
氏來文章鬱然盛齒上國矣
自晦翁倅郡時命父老講讀
家禮法頽風再淳知禮尚義

矣媿令茲土縻廩祿葑載訖
無成見今俗在美故之間邑
民性剛剛則戾多訟民性質
質則嗇多野但耕男織女夙
夜毋靡毋惰有唐風焉流惡
而嗜好匪異人任抑齋氏先

得余心者慕述近事凡關邑
大致各為悲激之辭於論叙
者發告我黎民歸責我令長
獨人物傳志授取而裁之必
其志行之高名節之著勲業
之隆足礪世磨鈍者紀之中

微而顯詳而畧美而核不以
位蔑德以跡蔑心凡以著教
也孔子曰吾之於人也誰毀
誰譽斯民也三代之所以直
道而行也授為是書也悉載
龍溪猶晉之乘爾敢曰竊取
之云乎敢曰竊取之云乎
知龍溪事萬安右洲劉天授
可全序

